


歷代通鑑輯覽





漢書門			
八	七	八	三
一	〇	三	號
七	七	八	架
冊			類

內閣文庫			
三	八	八	漢
五	〇	七	書
兩	七	八	類
四	冊	架	

內閣文庫			
番號	漢	8783	
冊數	79( 2 )		
函號	285	17	

三四





御批歷代通鑑輯覽卷之三

戊午年

周起武王十三年己卯至赧王五十九年乙巳凡二百七十四年又東周君七年共八百一十一年

武王

姬姓名發后稷之後系見前嗣文王為西伯與師伐紂遂

革殷命

己卯十有三年春即商紂三十三年王即位國號周

王既克商商之百姓咸待于郊王使告曰上天降休商人皆拜王亦答拜翼曰命除道修社王入商宮諸侯百官畢從豐社而告史記作尹佚策祝今依帝王世紀曰殷之末孫季紂殄廢先王明德侮蔑神祇不祀昏暴商邑百姓其章顯

聞于天肆予小子膺受大命革殷受天明命王載拜稽首乃出改有天下之號曰周以木德王

封紂子祿父武庚名為殷侯

封祿父以殷之餘民因殷初定未集乃使弟管叔鮮蔡叔度相祿父治殷

復商舊政

命召公釋箕子之囚命畢公釋百姓之囚表商容商之賢臣

之間命南宮括散鹿臺之財發鉅橋之粟以振貧弱命

南宮括史佚展九鼎寶玉命閔天封比干之墓比干墓在衛輝府汲縣北

于是萬姓悅服

夏四月王歸至豐諸侯受命于周

王來自商至于豐乃偃武修文歸馬于華山注見前之陽

放牛于桃林山海經考父山北有林焉名曰桃林地在今陝西潼關縣東南之野庶邦

冢君暨百工受命于周

大封建諸侯于天下

封黃帝之後于蓊今順天府大興縣周初蓊國帝堯之後于祝今山東濟南府長清縣有祝阿故城古祝國

帝舜之後于陳都宛邱注見前是為三恪復

封夏后氏之後于杞今河南開封府杞縣與殷之武庚是為

二王之後又封師尚父于齊都營邱故城在今山東青州府昌樂縣弟周

公旦于魯今曲阜召公奭周之支族于燕史記正義召公始封在比平無終縣以燕

山為名無終今順天府薊州庶叔高于畢今陝西西安府咸陽縣畢原畢公邑皆留相

王室封弟叔鮮于管今開封府鄭州有管城鮮所封邑叔度于蔡今河南汝

寧府新蔡縣故叔處于霍今山西平陽府霍州有霍城處所封以監殷是

為三監餘各以次受封封于曹叔武于邲季載于聃庶

弟叔繡于滕叔鄭于毛封同姓之國諸叔于邲于聃于

雍于原于鄆號仲于西號號叔于東號泰伯仲雍之後

周章于吳章之弟于夏墟為虞封異姓之國神農之後

于焦少昊之後于莒祝融之後于邾四岳之後于許仲

熙弟雍滑之後于薛衛今河南衛輝府淇縣有朝歌

故城康叔封此曹今山東兗州府定陶縣有曹故城振

鐸封此邲史記作成今山東兗州府寧陽縣有成縣故

城叔武封此聃國于那處今湖北安陸府荆門州那口

會纂注國在河南府宜陽縣部今曹州府城武縣有部

城周部國部今山西蒲州府猗氏縣有郟城周部國

今河南懷慶府修武縣有雍城周雍國原今懷慶府

源縣有原城周原國鄭今西安府鄠縣有鄠城周鄠國

西號今陝西鳳翔府寶雞縣之號城是東號今河南

封府河陰縣之號亭是吳今江南常州府無錫縣有

里鄉泰伯所居是為勾吳虞即西虞本舜後所封周以

封仲雍後西虞注見前焦今河南陝州之焦城是古邲

許今河南許州是薛注見前

祀于祖廟追王太王王季文王遂定諡法

始定祀先之禮諱名立諡追王古公亶父曰太王季歷

曰王季文考曰文王自祖紺以上至后稷以天子之禮

祀焉

柴于上帝望于山川

告武成也

以建子月為歲首改祀曰年

十一月建子得天之正是謂天統以夜半為朔

色尚赤

牲用騂赤戎事乘騂白腹朝燕服冕注見前而元衣

立徹法。

一夫受田百畝鄉遂郊門之內用貢法十夫有溝田不井授但為溝洫都鄙郊外地用助法八家同井耕則通力而作收則計畝而分故謂之徹。

建學。

國中並立四代之學辟雍王制天子曰辟雍注辟明離和也雍與靡同居中北虞學東夏學西殷學是為大學又建虞庠于西郊夏序于州殷校于黨皆鄉學是為小學俱祀先聖先師人生八歲自王公至庶人之子弟俱入小學十五歲自天子之元子眾子以至公卿大夫元士之適子及凡民之俊秀皆入大學凡入學以齒太子亦齒焉春秋教以禮

樂冬夏教以詩書。

養老。

養國老于東膠。

大學在王宮之東膠糾也

庶老于虞庠兼用燕饗食

禮春夏用燕饗禮

憲法也法

而乞言袒而割牲執醬而

饋執爵而酌

以酒漱口曰酌

受丹書之戒作銘自警。

王召士大夫而問曰惡有藏之約行之博萬世可以為

子孫恒者乎師尚父進丹書于王道其言曰敬勝怠者

吉怠勝敬者滅義勝欲者從欲勝義者凶王聞之惕若

恐懼退而為戒書于席之四端及機鑑盥盤楹杖帶履

觴豆尸牖劍弓矛各有銘焉

席前左端之銘曰安樂必敬右端之銘曰無行可悔

機銘口生喙口戕口說者謂舊本脫字率以口識之類字意不然易傳以言為君子之樞機樞機之發榮辱之主口生喙者即所云思羞與我生也口戕口者即所云悖出悖入是也他本所傳機有作几作机者不以大戴禮于本義尤為直揭若虛辭所注出令依凡之說雖不過沿文索解其義亦通

後左端之銘曰一反一側亦不可以忘右端之銘曰所鑑不遠視爾所代機之銘曰皇皇惟敬口生喙口戕口寧溺于淵溺于淵猶可游也溺于人不可救也楹之銘曰母曰胡殘其禍將然母曰胡害其禍將大母曰胡傷其禍將長杖之銘曰惡乎危于忿毒惡乎失道于嗜慾惡乎相忘于富貴帶之銘曰火滅修容慎戒必恭恭則壽履履之銘曰慎之勞勞則富鰲豆之銘曰食自杖食自杖戒之慎慎則逃戶之銘曰夫名難得而易失無懲弗志而曰我知之乎無懲弗及而曰我杖之乎援阻以泥之若風將至必先搖搖雖有聖人不能為謀也脯之銘曰隨天時地之財敬祀皇天敬以先時劍之銘曰帶之以為服動必行德行德則興背德則崩弓之銘曰屈弗忍終身之羞予一人所聞以戒後世之子孫

訪道于箕子

禹治洪水浴出書法見前法而陳之為洪範九疇至是王訪箕子以天道箕子乃推衍增益以成其篇初一日五行次二日

敬用五事次三曰農用八政次四曰協用五紀次五曰建用皇極次六曰又用三德次七曰明用稽疑次八曰驗用庶徵次九曰嚮用五福威用六極箕子不欲臣周亡于朝鮮今高麗國王因以封之

作大武樂

象武功定天下也詳見左傳樂記不具載

殷伯夷叔齊伯夷姓墨胎名允字公信夷諡也叔齊名智字公達齊亦諡也餓死于首陽

山注見前

初王伐紂伯夷叔齊扣馬而諫左右欲兵之太公曰此義人也扶而去之及王平殷亂天下宗周伯夷叔齊恥之隱于首陽義不食周粟採薇而食之卒以餓死古史齊採薇野有婦人曰子不食周粟此亦周之草木也于是餓死

夷齊不食周粟特謂義不仕周受祿餓死者亦不負

餓以死云爾古史考舉野  
婦之語竟似夷齊并不食  
薇以致餓死不免固哉高  
粲之譏矣

庚辰

十有四年。西旅。西方之戎。有國名旅。貢獒。犬高四尺曰獒。

時九夷八蠻。夷蠻四夷之通稱。八九明其非一。通道來貢。西旅底貢。厥

獒。太保召公奭以獒非常貢。明王不貴異物。乃作書訓

王。名曰旅獒。

肅慎氏。今寧古塔地。貢矢。

楛矢石砮。楛木之矢。以石為鏃。長尺有咫。王欲昭令德之致遠。銘

其楛曰。肅慎氏之貢矢。

遷都于鎬。帝王世紀。武王遷鎬。鎬池。即其故都。水經注。自漢武穿昆明池。基溝淪陷。無可考。

自太王居岐。名國為周。是為岐周。至王。自豐宅鎬。是為

宗周。于是建辟廡。興禮樂。周道四達。無思不服。

王不豫。周公旦告于祖考翼曰。瘳。

公為三壇同墀。築土曰壇。除土曰墀。為壇于南方。北面植璧秉圭。

乃告太王。王季。文王。史乃冊祝。請以身代。歸納策于金

縢。匱中。王翼曰。乃瘳。

壬午。十有六年。箕子來朝。

箕子過故殷墟。傷故都宮室毀圯。禾黍生焉。欲哭不可。

欲泣則近婦人。故作麥秀之歌曰。麥秀漸漸兮。禾黍油

油兮。彼狡童兮。不與我好兮。殷之遺民聞之。莫不流涕。

乙酉。十有九年。冬。十有二月。王崩于誦立。是為成王。

王丕承文王之烈。一戎衣而有天下。建官惟賢。位事惟

能。垂拱而天下治。嗣西伯十有三年。踐天子位。七年崩。

禮記。年九十三。竹書紀年。年五十有四。周公旦奉元子誦立。

金氏履祥斥戴記之訛似已但如履祥所云文王生于祖甲庚寅至帝乙壬辰始生武王則年已六十有三矣殊不知武王為太姒次子詩稱文王初載天作之合則太姒之年亦可知如謂至是始生武王後復生周公及諸叔凡八子此尤事理所必無者大率三代以上載籍殘缺儒生各逞臆說遂至支離膠轕若此蓋古史之事在存疑不可深論者多矣

金氏履祥曰戴記文王世子篇文王九十七乃終武王九十三而終若如其言武王八十一而生成王後此又依竹書紀年之年以正戴記之訛云

成王

武王納太公望之女曰邑姜生王至是武王崩王立年十有三周公旦相王踐阼而治

丙

元年王諒闇周公旦為冢宰總百官

史記武王崩成王少周公恐諸侯畔

周乃攝行政當國凡七年成王長乃反政考周書蔡仲之命惟周公位冢宰正百王蔡沈書集傳曰此言武王崩時也成王在諒闇周公居家宰百官總已以聽乃古今之通道非如荀卿所謂攝天子之位也三年之喪二十五月而畢周公固未嘗攝亦非有七年而後還政之事也今依蔡傳不取史記之說

夏葬武王于畢

武王陵在西安府咸陽縣文王陵在南武王陵在北

王冠

周公既葬武王乃冠王以朝于廟而見諸侯使祝雍作頌雍之辭曰使王近于民遠于佞齊愛也不惠于財親賢而任能其頌曰令月吉日王始加元服去王幼志服袞職欽若昊天六合是式率爾祖考永永無疑周公旦誥召公奭

召公為保周公為師相王左右召公不悅周公作君噴以告之于是召公乃悅與周公夾輔王室自陝今河南以西召公主之自陝以東周公主之

周公留相王室使其子伯禽代就封于魯周公戒伯禽

召公欲去周公作書留之本自直截了當至召公為保周公為師召公不悅云云凡大臣通達國體者即不應出此况二公乎且釋本籍語惟拳拳以祈天永命保泰持盈勸其同心輔政而蔡沈本傳亦無一語及之何必沿漢儒所托之書序以猜疑小見妄揣古



曰。我文王之子。武王之弟。今王之叔父。我于天下。亦不賤矣。然一沐三握髮。一飯三吐哺。起以待士。猶恐失天下之賢人。子之魯慎。毋以國驕人。初。太公封于齊。五月而報政。周公曰。何速也。曰。吾簡其君臣。禮從其俗。伯禽至魯。三年而後報政。周公曰。何遲也。曰。變其俗。革其禮。喪三年而後除之。周公曰。後世其北面事齊乎。夫政。不簡不易。民不能近。平易近民。民必歸之。

亥丁二年。周公居東。

時管叔及羣弟。蔡叔。霍叔。流言于國曰。公將不利于孺子。周公乃告二公。書傳謂太公召公。曰。我之弗辟。去聲。我無以告我先王。遂居東。取易三百八十四爻。各繫以辭。憂武庚必

叛。王室必搖。乃作鴟鴞之詩以貶王。詩序。幽風。鴟鴞。周公救亂也。成王未

知周公之志。公乃為詩以貶王。

子戊三年。秋。大雷風。迎周公于東。

周公居東二年。王知罪在管蔡。是年秋。大熟。未穫。天大雷電。以風。禾盡偃。大木斯拔。王與大夫盡弁。以啓金縢之書。見公。請代武王之說。王執書以泣。親逆也。迎。公出郊。天乃雨。反風。禾盡起。歲則大熟。

管叔鮮。及蔡叔度。霍叔處。以武庚叛。王命周公討平之。

王迎周公歸。三叔懼。挾武庚以叛。奄。地理。今釋。兗州府曲阜縣。奄里。括地志云。奄。及淮夷。淮水注見前。淮夷。徐戎。地理。今釋。泗州國之地。及淮夷。淮南北近海之夷。徐戎。徐城廢縣。古徐國。皆應之。王乃命周公東征。大誥天下。作大誥。周公殺武

庚誅管叔。囚蔡叔于郭鄰。郭。逸周書作號。鄰。鄰遂之地。降霍叔為庶

人。命伯禽帥師平徐戎。定魯。寧淮夷。師還。周公作東山

之詩。以勞士卒。朱子詩傳。東山。周公東征既歸。作此以勞歸士。

封微子啓于宋。今歸德府商邱縣。宋地。古闕伯之墟。通志。周封微子于宋。以為商後。故曰商邱。

使紹殷後。修其禮物。作賓王家。作微子之命。

巳丑四年。王朝于廟。

延訪羣臣。羣臣進戒。詩序。閔予小子。嗣王朝于廟也。訪落。王謀于廟也。敬之。羣臣進戒也。

小。恭。嗣。王。求助也。

周公作立政。

周公戒王以用人之道。作立政。于時淮奄未盡平。公以武不可弛。故于篇終告

王曰。其克詰爾戎兵。以陟禹之迹。方行天下。至于海表。罔有不服。以觀文王之耿光。以揚武王之大力。

金氏履祥曰。立政亦成王初年之書。故其官名與周禮未盡合。胡氏大紀係于四年之下。是為得之。

王伐淮夷。踐奄。滅也。書序。書傳。俱以踐奄在營洛之後。金氏以前編。以多士篇有朕昔來自奄之文。因

以多方紀多士之前。今從之。

奄及淮夷復叛。王乃東征淮夷。遂滅奄。遷其君子蒲姑

史記作薄姑。今山東青州府博平縣東北。有薄姑城。

庚寅五年。遷殷民于洛邑。今河南府洛陽縣東。有洛陽故城。周遷殷民于此。

王來自奄。遷殷之餘民于洛邑。歸至宗周。作多方。以誥

庶邦。

蒐于岐陽。岐山。注見前。

因盟諸侯。

辛卯六年。正百官。書序。成王滅淮夷。還歸在豐。作周官。

立太師太傅太保。曰三公。少師少傅少保。曰三孤。冢宰掌邦治司徒掌邦教宗伯掌邦禮司馬掌邦政司寇掌邦禁司空掌邦土。爲六卿六卿分職各率其屬以倡九牧。九州之阜成兆民。

制禮作樂

制周禮以經邦國。曲禮以節威儀。禮記疏經禮三百。周官是也。周官三百六十。舉其成數。故曰三百。曲禮三千。儀禮是也。履行五禮之別。委曲繁廣。故曰三千。總其凡有五。曰吉凶軍賓嘉。舉其大有六。曰冠婚喪祭鄉飲酒。相見作樂。曰勺酌。以告成大武。頌武王之功。以告成于廟也。又分六樂而序之以祀。以祭以享。奏黃鍾歌大呂舞雲門以祀天神。奏太簇歌應鍾舞咸池以祭地祇。奏姑洗歌南呂舞大韶以祀四望。奏蕤賓歌函鍾舞大夏以祭山川。奏夷則歌小呂舞大濩以享先

妣姜嫄奏無射歌夾鍾舞大武以享先祖。奏房中之樂。關雎爲房中之樂。以歌后妃之德。

越裳氏注見前來朝。

越裳氏重三譯而來。獻白雉。周公曰。德澤不加。君子不享其贄。政令不施。君子不臣其人。譯曰。吾國之黃耆曰。天無烈風淫雨。海不揚波。三年矣。意中國有聖人乎。于是來朝。周公致薦于宗廟。使者迷其歸路。公錫駢車五乘。皆爲指南之制。使者載之。期年而至其國。

七年營東都。今河南府洛陽縣西有河南廢縣。卽周東都。漢書地理志。河南郡河南故鄆地。周

初武王克商。遷九鼎于洛邑。將營都而未果。考史記。武王謂周公

曰我南望三塗北望嶽鄙顧瞻有河粵詹洛伊毋遠天室營周居于洛邑而後去語出逸周書度邑篇三塗山名在河南府嵩縣西南嶽鄙杜預曰嶽河北太行山鄙都鄙近嶽之邑伊水注見前至是王欲

如武王之志命召公先之洛相宅書序成王欲宅洛邑使召公先相宅作召

誥謂周水東瀍水西澗水出洛陽縣穀城山俱入洛

申視卒營築書序周公往營成周使來告卜作洛誥謂之東都曰此四方

入貢道里均也于是王至新邑洛誥戊辰王在新邑朝諸侯祀清

廟詩序清廟祀文王也既成洛邑朝諸侯率以祀文王焉定鼎于郊帝王世紀

鄩陌其南名定鼎門蓋鼎所從入也卜世三十卜年七百王歸命周公留

後分正東都分別其民正定其居也

設南郊郊之祭兆于南郊就陽位也建明堂在國之南辰巳之地高三丈方三百步上圓下方八

牕四闕其室考工記作五室大戴禮作九室揚復曰五室取五方之義九室則五方之外必備四隅也九室之制視

尤備

五室為尤備

郊祀后稷以配天詩序思父后稷配天也朱子曰為壇而祭故謂之天宗祀文王

于明堂以配上帝詩序我將祀文王于明堂也朱子曰祭于屋下而以神祇祭之故謂之帝

立大社

東青土南赤土西白土北驪黑土中央黃土比建諸侯鑿取其方

一面之土苞以黃土苴以白茅以為土封故曰受削土于王室

八年三月金氏前編以為營洛之三月蔡氏書集傳以為次年之三月今從書集傳周公誥

殷士于新邑

周公既營洛邑又卜瀍水東為下都即今洛陽故城是曰成周

遷殷民處之前既遷矣此復安集之也乃以王命告作多士集傳曰商民遷

洛者亦有有位之士故周公以王命告之

普天之下莫非王土分土以封之是削土也苞黃土白之說鑿哉

封蔡叔子胡于蔡。

書序。蔡叔既沒。王命蔡仲踐諸侯位。作蔡仲之命。

蔡叔度既沒。其子胡率德改行。周公舉以為卿士。言于王。復封之。蔡以奉蔡叔之祀。

甲午九年。封弟叔虞為唐侯。

今山西平陽府翼城縣西。有唐城。叔虞所封。史記。唐在河汾之

東。方百里。即此。

堯之裔封于唐。

寰宇記。夏后時。封劉累之孫于此。

至是。唐為亂。王滅之。

與弟叔虞戲。削桐葉為珪。曰。以此封若。史佚請擇曰。王

曰。吾與之戲耳。史佚曰。天子無戲言。言則史書之。禮成之。樂歌之。遂封叔虞為唐侯。

柳氏宗元曰。王者之言。要于其當。設有不當。雖十易之。不為病。若必遂從而成之。不幸而王以桐葉戲。婦亦將舉而從之乎。

乙未

十年。王游于卷阿。

卷。曲也。阿。大陵也。

召公從。因王之歌。作卷阿之詩。以進戒。

詩序。卷阿。召康公戒成王也。

丙申

十有一年。周公作無逸。

周公欲王知稼穡之艱難。先已備陳七月之詩。朱子詩集傳。周

公以成王未知稼穡之艱難。故陳后稷公劉風化之所由。使瞽瞍朝夕諷誦以教之。至是在豐。又

作無逸之書。以訓于王。

周公薨。

諡曰文。

公在豐。病將歿。曰。必葬我成周。以明吾不敢離王。既薨。

王葬公子畢。

長安志。周公墓在咸陽縣東北。

從文王。以明不敢臣也。復

以公有大勳勞。命魯公世祀。以天子禮樂。

程子曰。周公之功。固大矣。皆臣子分所當為。魯安得獨用天子禮樂哉。成王之賜。伯禽之受。皆非也。

皇朝於舜明良合德。故其言簡。召公子成王。老成進戒。故其言長。然意猶懇款。後先揆正。不在體製。有古今時代有久近也。

命君陳治東都作君陳

周公既歿以君陳代公分正東郊天子之國五十里為近郊下都在洛師之

東故曰東郊

丁酉十有二年巡狩

諸侯朝于方嶽因行黜陟之典

戊戌十有三年作九府天府玉府內府外府泉府職幣職金圜法

初虞夏商之世幣金三品或黃或白或赤至是太公望立九府

圜法錢圜函方輕重以銖布帛廣二尺二寸為幅長四

丈為疋

庚戌二十有五年大會諸侯于東都

四夷各以其方物至史臣為作王會之篇

戊王三十有七年夏四月王崩子釗立是為康王

四月王不懌甲子召太保及羣臣受顧命書序成上將

敬保元子釗越翼日乙丑王崩太保命逆元子釗于南

門之外入翼室恤宅宗引入路寢東夾室為居憂宗主也癸酉元子釗

麻冕黼裳古服也受冊命即位朝見諸侯于應門內太保

率東方諸侯入應門右諸侯聽命出書序康王誥諸侯作康王之誥乃

釋冕反喪服

葬于畢成王陵在文王陵西南

王在位三十七年祇勤于德夙夜不逮興禮樂立制度

民和睦而頌聲作

康王

癸亥元年。朝于豐宮。

徧告諸侯。宣示文武之功業。

乙丑三年。吉禘于先王。

遂定樂歌。

甲戌十有二年。夏六月。命畢公保釐東郊。保安。釐。正也。

王自宗周。至于豐。册命畢公。分居里成周郊。帝王世紀。分民之居。

里于成周之郊。尚書集傳。卽經文表厥宅里。殊厥井疆也。作畢命。

戊子二十有六年。召公薨。諡曰康。

初。公治西方。甚得民和。有司請召民。公曰。不勞一身而勞百姓。非吾先君文王之志也。乃巡行鄉邑。聽斷于棠樹之下。及卒。人思其政。不忍伐棠樹。作甘棠之詩歌詠。

之。詩序。甘棠。美召公也。今河南陝州有甘棠驛。以召公名。

王崩于瑕立。是為昭王。

王克臻洪業。敬恭神人。四裔賓服。海內晏然。百姓興于

禮義。囹圄空虛。刑措不用。四十餘年。有唐虞之風焉。

葬于畢。康王陵。在文王陵東南。

昭王

己丑元年。

王之時。王道缺微。周始衰。

壬寅十有四年。魯公子濩弒其君宰。伯禽之孫。幽公。而自立。是為魏公。

金氏履祥曰。弒君爭國之禍。自是始。而王不能討。失政甚矣。

己卯五十有一年。有光五色。貫紫微。紫宮垣。一曰紫微。井水溢。

王崩于漢子滿立是為穆王

王南巡狩反濟漢漢水注見前漢濱之人以膠船進王至中

流膠液船解王及祭公周公後伯爵皆溺焉大紀王隕于漢王右幸餘靡振

王以濟王遂發疾崩

穆王

王生于昭王之二年國語昭王娶于房曰房后生穆王至是即位年已

五十餘

庚辰元年築祗宮圻內遊觀之宮

三年命君牙為大司徒伯冏為太僕正作君牙及冏命

丙午十有七年王西巡狩徐戎叛徐戎注見前王歸征克之

王得八駿馬一赤驥二盜驪三白義四渠黃五騊駼六騊駼七騊耳八山子有造父者

蜚廉之後以善御幸遂西巡狩樂而忘歸四方諸侯爭訟無

所質正咸歸于徐贏姓國子爵地方五百里徐子行仁義故諸侯多歸之徐子得

朱弓赤矢以為天瑞自稱偃王朝之者三十六國王聞

徐子僭號恐遂稱受命乃命造父御一曰千里長驅而歸使楚人伐徐徐子不忍鬪其民北走彭城今徐州府

百姓從之者以萬數徐子將死曰吾賴于文德而不明

武備故至此

封造父于趙城今平陽府趙城縣有故城在縣西南即造父之邑

以御八駿功故封其後為趙氏至晉趙衰始著

甲寅三十有五年征犬戎西戎名舜竄三苗于三危其後繁熾夏之衰犬戎入居邠岐之間

王將征犬戎祭公謀父諫曰不可先王耀德不觀兵王

一曰千里長驅而歸雖順風揚帆有所不能而謂馬能之乎蓋馬之健者不過能行數百里其能千里而不疲者即良驥也後之務奇者並不識馬安能識良無怪乎其論之失實矣



不聽遂征之得四白狼四白鹿以歸自是荒服者不至

巳巳五十年命呂侯呂國名注見前作呂亦作甫刑。

王命呂侯為大司寇作修刑辟周制五刑凡二千五百王增至三千訓夏

贖刑訓暢夏后時贖刑之法制為五罰墨辟疑赦其罰百鍰劓辟疑赦其罰惟倍荆辟疑赦其罰倍差宮

辟疑赦其罰六百鍰以詰四方。

蔡氏沈曰呂命專訓贖刑本舜典金作贖刑之語以行其一切權宜之計然其哀矜惻怛猶有三代忠厚之遺

意

甲戌五十有五年王崩于祗宮子繫扈立是為共王

王之初思保位為難欲自警寤作史記書事之要戒俾

戎夫官名言之朔望以聞厥後欲肆其心周行天下祭

公謀父作祈招之詩祈父周司馬招其名也詩曰祈招之愔愔式昭德音思我王度式如

玉式如金刑民之力而無醉飽之心以止王心是以獲沒于祗宮。

共王

乙亥元年。

丁丑三年滅密密國即密須地注見前

王游于涇上涇水出甘肅平涼縣笄頭山至西安府高陵縣入渭密公從有三女

奔之其母曰必致之王夫女三為粢美物也而何德以

堪之密公不獻一年王滅密。

丙戌十有二年王崩子囂立是為懿王

懿王

丁亥元年徙都于槐里漢書地理志右扶風槐里周曰犬邱懿王都之故城在今西安府興平縣

東南

御此歷代通鑑輯覽

卷之三 周共王 懿王 孝王

共

二十有五年。王崩。共王弟辟方立。是為孝王。

孝王

子王元年。

甲子 十有三年。封非子于秦。地理今釋。今陝西秦州有秦亭。非子所封。

非子。惡來革之後。秦世譜。惡來。女防旁。居犬邱。好馬。善

養息。之王使主馬于汧。汧。水名。在鳳翔府渭前。注見之間。馬

大蕃息。乃分土為附庸。邑之秦。曰昔伯翳為舜主畜。多

息。故有土錫。姓曰嬴。今其後亦為朕息馬。其使續嬴氏

祀號曰秦嬴。

大雨雹。江漢冰。

胡氏一桂曰。嬴秦始封而災。異即見履霜之象。已兆于此。

丙寅 十有五年。王崩。懿王子燮立。是為夷王。

夷王

王為懿王太子。孝王崩。諸侯復立為王。

丁卯 元年。觀禮廢。

觀禮。天子不下堂而見諸侯。王德諸侯之立已。始下堂

而見。降與抗禮。

己巳 三年。命虢公伐太原之戎。後漢書西羌傳。穆王遷戎

于太原。舊說以為即山西太原。顧炎武曰。在今甘肅平涼府固原州。後魏立原州。以古太原而名。

至于俞泉。地名。獲馬千匹。

甲戌 八年。楚子熊渠伐庸。今湖北鄖陽府竹山縣。古庸國。揚粵。漢書南粵王

師古曰。本揚州。至于鄂。武昌縣。有鄂城。

熊渠之先曰鬻熊。注見前。事文王有勤勞。成王時封其後

曰熊繹。鬻于楚。先曰荆。後錫以子男之田。姓芊氏。居

丹陽。今湖北宜昌府歸州。有古丹陽城。楚始封此。曰西

楚。後徙枝江。亦曰丹陽。是為南楚。今荊州府枝江

縣。傳至熊渠。熊繹五世孫。王室微諸侯相伐。熊渠甚得江漢

間民和。乃興兵。西伐庸東。侵揚粵。至于鄂。熊渠曰。我蠻

夷也。不與中國之號諡。乃立其諸子為王。長子康為句

為鄂王。少子執。分處江上。厲王時。熊渠畏王。伐楚。去其王號。

王十有六年。王崩。子胡立。是為厲王。

殺齊侯不辰。太公元年。孫哀公。

紀侯。姜姓。今青州府壽光縣。有紀城。紀侯國。譖齊侯于王。王烹齊侯而立

其弟靜。是為胡公。徙治薄姑。

厲王

癸未元年。

王暴虐。詩人作刺。召穆公作民勞蕩。凡伯作板。芮伯作桑柔。皆以刺王。

十有九年。齊公子山。弑其君靜而自立。是為釁公。

哀公之同母少弟山。怨胡公。乃與其黨。襲殺胡公。而自

立。盡逐胡公子。徙治臨淄。故城在今臨淄縣北。亦曰齊城。

三十年。以榮夷公為卿士。墨子。厲王染于榮夷。終。論語疏。榮公。武王時為天子公卿

其後也。夷公蓋其後也。

王好利。說榮夷公芮良夫。姬姓。伯爵。世為王朝卿士。諫

曰。榮公好專利。而不知大難。夫利。百物之所生也。天地

之所載也。王人者。將導利而布之上下。猶曰。怵惕懼怨。

之來也。今王專利其可乎。榮公若用，周必敗。王不聽，卒以爲卿士，諸侯不享。

乙卯 三十有三年，使衛巫衛國之巫監謗。

王無道，國人謗王。召公召康公之後穆公虎，世輔王室，食采于召。今鳳翔府岐山縣召亭。諫曰：民不堪命矣。王怒，得衛巫使監謗者，以告，則殺

之。國人莫敢言，道路以目。王喜，告召公曰：吾能弭謗矣。召公曰：是障之也。防民之口，甚于防川，是故爲川者決

之使導，爲民者宣之使言，若壅其口，其與能幾何。王不聽。

聽。

己未 三十有七年，王出居于彘。今平陽府霍州有彘城。元和志，卽周厲王所奔之地。

王心戾虐，萬民弗忍，乃相與畔，襲王。王出奔于彘。太子

靖匿召公家，國人圍之。召公曰：昔吾驟諫王，王不聽，故

至此，今殺王太子，王其以我爲讐而懟怒乎。夫事君者，

險而不懟，怨而不怒，况事王乎。乃以其子代王太子。太

子竟得脫。

庚申 三十有八年，王在彘，共和行政。

召公、周公周公，元子伯禽，就封于魯。次子留，相王。室世爲周公，食采于雍。今陝西鳳翔縣。二相

以太子靖幼，相與協和，共理國事，號曰共和。

癸酉 五十有一年，王崩于彘。周公、召公奉太子靖卽位。是爲宣王。

太子長于召公之家。共和十四年，厲王崩，二相乃共立之，爲王，輔之，修政，諸侯復宗周。

宣王

甲戌元年命秦仲征西戎。

初厲王之時西戎反王室滅犬邱大駱非子之族王即父

位命秦仲為大夫率其國人征之。

命尹吉甫路史少昊子般封尹在汾州及周為尹氏采邑有吉甫墓北伐玁狁北狄

時玁狁內侵逼近京邑詩玁狁匪茹整居焦獲侵鎬及方至于涇陽焦獲爾雅十藪之一在今西安府涇陽縣鎬劉向以為千里之鎬非鎬京也方即朔方朱子曰靈夏等州地涇陽涇水之北也

王命吉甫北伐逐之太原注見前而歸于是有六月之詩

詩序六月宣王北伐也

乙亥二年命方叔詩傳周卿士五官之長故曰元老南征荆蠻即楚

時荆蠻背叛方叔嘗預北伐有功詩顯允方叔征伐玁狁蠻荆來威王

命率師南征荆蠻來服于是有采芑之詩詩序采芑宣王南征也

命召虎平淮夷淮南之夷

淮夷不服王命召虎率師循江漢討平之詩江漢湯湯武夫泚泚經

營四方告成于王疆理其地南至于海詩于疆于理至于南海師還錫虎

圭瓚秬鬯以嘉其勳尹吉甫乃賦江漢之詩以美之詩序

江漢尹吉甫美宣王也能興衰撥亂命召穆公平淮夷

王親征徐戎在淮之北

王既命召虎平淮南之夷乃親率六師太師皇父為帥程伯休父為司

馬以征淮北徐方來庭召虎作常武之詩美王因以為

戒詩序常武召穆公美宣王也有常德以立武事因以為戒孔疏戒者就常德之中而戒使常行也

己卯六年大旱自二年不雨至于二年

王承厲王之烈內有撥亂之志遇菽而懼側身修行欲

消去之天下喜于王化復行百姓見憂天下百姓見被矜憂仍叔

仍氏叔字周大夫作雲漢之詩以美之

秦仲死于西戎命其子伐戎破之

西戎殺秦仲仲有子五人長者為莊公王召其昆弟與兵七

千使伐西戎破之于是與其先大駱犬邱之地與莊公為

西垂大夫今甘肅秦州有西縣故城秦莊公所居漢為縣後廢

八年巡狩東都

王內修政事外復文武之境土乃選車徒備器械會諸

侯于東都因以田獵講武詩人為作車攻吉日詩序車攻宣王

復古也吉日美宣王田也

乙酉十有二年立魯侯敖魏公之孫武公之少子戲為魯世子

魯侯與長子括少子戲來朝王愛戲欲立為魯世子樊

仲山甫大王子虞仲支孫食采于樊亦曰陽樊今河南懷慶府濟源縣皮城是也諫曰不可

不順必犯犯王命必誅故出令不可不順也若魯從之

諸侯效之王命將有所壅若不從而誅之是自誅王命

也王卒立之是為懿公其後括之子伯御弑戲而自立事在二十

年一

不藉千畝文獻通考周制天子孟春之月擇元辰帥公卿諸侯大夫躬耕藉田千畝于南郊是而朱紘躬

秉耒天子三推三公五推卿諸侯九推庶人終畝厲王時藉田禮廢宣王不復遵古

王不修藉于千畝虢公諫曰民之大事在農是故稷為

大官惟農是務三時務農而一時講武故征則有威守

則有財若是乃能媚于神而和于民今天子欲修先王

之緒而棄其大功。置神之祀而困民之財。何以求福用民。王弗聽。

未乙二十有二年。王后姜氏諫王。

姜后賢而有德。王嘗晏起。后脫簪珥待罪于永巷。使其傅母通言于王曰。妾不才。至使君王失禮而晏朝。敢請罪。王曰。寡人不德。實自生過。非夫人之罪也。遂勤于政。早朝晏退。繼文武之迹。成中興之業。為周世宗。

封弟友于鄭。西馬畿內邑。今陝西華州鄭縣故城是。後徙號郟之間。今河南新鄭縣是。其餘民南保漢中。今漢中府南鄭縣是。

友厲王少子。王封之鄭。并賜之祊田。今山東沂州府費縣有故祊城。為天子巡狩。助祭泰山湯沐之邑。

乙三十有二年。伐魯。誅伯御。立魯侯之弟稱。是為孝公。

王既誅伯御。問魯公子能導。一作訓。順諸侯者。以為魯後。

樊仲山甫曰。懿公之弟稱。肅恭明神。故事者老。賦事行刑。必問于遺訓。咨于故實。王曰。是能訓治其民矣。乃命魯侯稱于夷宮。祖夷王廟也。

癸丑四十年。料民于太原。注見前。

初。王伐姜戎。四岳之裔。初居瓜州。後徙中土。敗績于干畝。地名。在今山西遼州。乃

料民。簡料其數。于太原。仲山甫諫曰。民不可料也。古者司民

協孤終。協考孤。切。終。死也。司商協民姓。別生分類。司徒協旅。師旅。司

寇協禁。罪隸刑。死之數。牧協職。物色之數。工協革。牛馬羊之皮。場協入。知粟

數。廩協出。知用。數。而又治農于藉。干畝。田也。蒐于農隙。耨穫亦

于藉王亦至于藉考課獮于既蒸狩于畢時是皆習民數者也

又何料焉且無故而料民天所惡也害于政而妨于後

嗣王卒料之

丙辰四十有三年殺杜伯西安府長安縣有杜城水經注周杜伯國

王將殺杜伯而非其罪伯之友左儒爭之九復之而王

不許王曰汝別君也猶昔而異友儒曰君道友逆則順君

以誅友友道君逆則順友以違君王卒殺杜伯儒死之

杜伯子叔隰奔晉為士氏

巳未四十有六年王崩子涅立史記作宮涅是為幽王

金氏履祥曰宣王初年有志撥亂周道復興然不克有終如廢魯適不藉于畝料民太原殺杜伯大畧可見其

後幽王繼之幸以東遷

幽王

元年立姜氏申侯女為王后宜臼申后子為太子

庚申三年納褒姒褒國名今陝西漢中府褒城縣古褒國

初宣王之時童謠曰檠弧箕服山桑為弓箕木為矢房實亡周國

于是王聞之有夫婦鬻是器者王使執而戮之府之小

妾生女而非王子也懼而棄之國語史伯曰夏之衰褒之神化為二龍以同于

王庭而言夏后卜請其醢積而藏之及殷周莫之發也厲王之末發而觀之醜流于庭不可除王使婦人不幃

而謀之化為元龜以入于王府府之童妾未既為弧服

者方逃于道收之以奔于褒後褒姒有獄請入此女子

王以贖其罪是為褒姒至是王入後宮愛而納之生子

伯服



三川震三川涇洛渭也地

伯陽父曰唐固曰伯陽父周柱下史老子也周將亡矣天地之氣陰伏

而不能出陽迫而不能蒸于是有地震今三川實震是

陽失其所而填陰也韋昭曰為陰所鎮陽失而在陰韋昭曰在陰下也

源必塞源塞國必亡昔伊洛竭而夏亡河竭而商亡今

周德若二代之季矣其川源又塞塞必竭川竭山必崩

山崩川竭亡之徵也若國亡不過十年數之紀也是歲

三川竭岐山崩

甲子五年廢申后及太子宜臼以褒姒為后伯服為太子

褒姒與虢石父比譖廢申后太子褒姒立為后伯服為

太子宜臼出奔申國名姜姓四岳之裔今河南南陽府南陽縣有申城申侯國太史

伯陽曰禍成矣無可奈何褒姒不好笑王悅之萬方故不笑乃無故舉烽火諸侯悉至至而無寇褒姒乃大笑

乙丑六年冬十月辛卯朔日有食之

于是有十月之交詩詩序十月之交大夫刺幽王也

丁卯八年以鄭伯友為司徒

友為司徒甚得周眾問于史伯曰王室多故子安逃死

乎史伯曰獨維之東土河濟之南可居公曰何以對曰

地近虢東虢注見前檜妘姓國居溱洧之間今開封府密縣有檜城虢檜之君貪

而好利百姓不附今公為司徒民皆愛公公誠請居之

虢檜之君見公方用事輕分公地虢檜之民皆公之民

也友曰善于是言于王從其民維東虢檜果獻十邑後武

公竟取十邑而滅虢檜。

庚午十有一年申侯以犬戎入寇弑王鄭伯友死之晉衛秦皆以兵來救立故太子宜白是為平王。

王欲殺故太子宜白求之于申申侯弗與召西夷犬戎

攻王王舉烽火徵兵兵莫至犬戎遂弑王于驪山下在

西安府臨潼縣東南虜褒姒鄭伯友死于戰秦襄公力戰破戎衛

侯和即武公康叔九世孫從晉侯仇叔虞封唐傳于燮改國為晉燮八傳為文侯仇合諸

侯兵逐戎黜伯服鄭世子掘突武公收父散兵從諸侯

東迎太子宜白立之。

御批歷代通鑑輯覽卷之四

周

平王

辛未元年東遷成王營洛邑平王徙都之謂之王城是為東周始命秦為諸侯錫晉

侯仇命。

王避犬戎難東徙洛邑秦襄公以兵送王王封襄公為

諸侯爵為伯賜之岐以西之地秦于是始國與諸侯通使

聘享之禮又策命晉侯書序平王錫晉侯拒賜以河內

今河南懷慶府附庸晉于是始大。

呂氏祖謙曰由此而上則為成康為文武由此而下則為春秋為戰國乃消長升降之交會

秦祠上帝于西時時音市封土而祀也

蘇賦謂周之失計未有如東遷之繆此言誠然但謂平王若不遷以形勢東臨諸侯諸侯尚未敢貳此則不然平王本非撥亂反正之才并無奮發有為之志縱使仍都豐鎬亦唯苟安且夕終於不振而已其能西却犬戎東撫諸夏乎且當時亦必有不得不遷之勢矣

秦伯既封居西垂自以為主少昊之神乃作西時祠白

帝其牲用騂赤馬駒黃牛羝羊詩傳各一司馬遷曰秦

諸侯遂作西時用祀上帝僭端見矣君子懼焉

三年以鄭伯掘突為司徒

鄭桓公為司徒死犬戎之難王子是復命其子掘突續

乃父之職國人愛之為作緇衣之詩詩序鄭風緇衣美武公也

九年秦東徙汧渭注俱見前之會今陝西鳳翔府隴州有秦城元和志秦文公徙此

秦襄公卒子文公嗣文公東獵至汧渭之會曰昔周邑

我先秦嬴于此考非子封秦地在今秦州此云邑我先秦嬴蓋非子息馬時食邑也後卒

獲為諸侯乃卜居之于是秦初有史以紀事已而作鄜音時用三

牢祠白帝史記封禪書秦文公夢黃蛇自天下屬地其口止于鄜衍公問史敦敦曰此上帝之居

其祠之于是作鄜時索隱曰鄜地名後為縣屬馮翊衍山陵間也

十有三年衛公和卒謚曰武公史記衛武公平戎有功王命為公卒子莊公揚立

衛公年九十五猶箴儆于國曰自卿以下至于師長士

苟在朝者無謂我耄而舍我必恪恭于朝夕以交戒我

于是作懿戒以自儆懿讀作抑即大雅抑之詩及其歿也謂之睿聖

武公

十有九年戊申申國注見前

王以母家申國迫近疆楚數被侵伐遣兵遠戍戍者怨

思作揚之水詩以刺詩序王風揚之水刺平王也不撫

焉其民而遠屯戍于母家周人怨思

朱子曰申侯與犬戎攻宗周弑幽王則申侯者平王不共戴天之讎也今平王知有母而不知有父知其立已

不吉... 卷之四  
為有德而不知其弑父為可怨。至使復讎討賊之師。反為報施。酬恩之舉。其忘親逆理。已甚矣。且不能行威令于天下。無以保其母家。乃勞民遠戍。其哀儒微弱。又可見矣。詩亡而後春秋作。其不以此也哉。  
卯辛 二十有一年。秦伯獻戎捷。

秦伯以兵伐戎。戎敗走。于是秦伯收周餘民有之地。至岐。岐以東。獻之王。時宗周宗廟宮室。盡為禾黍。大夫行役過之。閱周室之顛覆。傍徨不忍去。作黍離之詩。詩序王風黍離。閉宗周也。

丙 二十有六年。晉侯文侯子昭封其叔父成師。穆侯子。文侯弟。是為

晉大夫師服曰。國家之立也。本大而末小。是以能固。故天子建國。諸侯立家。卿置側室。衆子也。得立此一官。大夫有貳宗。

次子為貳宗。士有隸子弟。白以其子弟為僕隸。今晉甸侯也。而建

國本既弱矣。其能久乎。後曲沃盛彊。晉室微弱。國內大亂。昭侯七年。晉潘父弑昭侯而納桓叔。不克。晉人立昭侯子平。是為孝侯。孝侯八年。桓叔卒。子緡代。是為曲沃莊伯。莊伯弑孝侯于翼。國人攻之。立孝侯子郊。是為鄂侯。鄂侯卒。莊伯復伐晉。王使虢公伐曲沃。立鄂侯子光。是為哀侯。

戊 四十有八年。魯侯惠公弗涅。孝公之子。請郊廟之禮。

魯侯使宰讓請郊廟之禮于王。王使史角往。魯侯止也。留

之。路史角後在魯。于是有墨翟之學。羅氏泌曰。劉原父謂使魯郊者必周。而非成王。蓋平王之世也。使成王已與魯則惠公不請矣。孔子曰。魯之郊禘。非禮也。周公其衰矣。魯之郊。豈所以尊公哉。

魯侯弗涅卒。諡惠公。

即比... 周平王

程子謂成王之賜伯禽之受皆為非禮。其言蓋引而未發。東遷以後。諸侯放恣。因禮樂之賜。而并及郊廟。王室不綱。從而許之。則泛觴之矣。非自成王伯禽乎。

適子軌少庶長子息姑攝國行君事。是為隱公。左傳惠公元如孟子卒。繼室以聲子。生隱公。宋武公生仲子。有文在其手曰為魯夫人。故仲子歸于魯。生桓公。而惠公薨。是以隱公立而奉之。宋武公各司空。微子弟微仲八世孫。

巳未 四十有九年。

時天子微弱諸侯放恣賞罰不行後孔子修魯史作春

秋立百王之大法托始于是年。是年為魯隱公元年。

金氏履祥曰此年以後編年紀事自有春秋左氏經傳。今特舉其事係王室與闕于天下之故者而後書。

鄭伯克段于鄆。今河南開封府鄆陵縣春秋鄭鄆邑縣西北有古鄆城。

初鄭武公娶申侯女姜氏。是為武姜。生太子寤生及叔段。姜

氏惡寤生愛段欲立之亟請于武公弗許武公卒寤生

立。是為莊公。姜氏為段請居京。京是故城在今河南開封府滎陽縣東南謂之京

城大叔祭仲。鄭大夫與周祭伯別為一祭。今河曰都城南開封府鄭州有祭城仲食邑也。曰都城

過百雉國之害也公曰姜氏欲之焉辟害。詩序鄭風將也。不勝其母以害其弟。仲子刺莊公。

小不忍以致大亂焉。大叔完聚繕甲兵具卒乘。詩序田叔處于京繕甲治兵多。叔于

才而好勇不義而得眾。將襲鄭夫人姜氏將啓之公

聞其期以車二百乘伐京京叛大叔段入于鄆公伐

諸鄆大叔出奔共。古共國今河南衛輝府輝縣治。遂寘姜氏于城穎

而誓之曰不及黃泉無相見也既而

悔之穎考叔為穎谷在今河南河南府登封縣穎水所出封人聞之有獻

于公公賜之食食舍肉公問之對曰小人有母請以遺

之公曰爾有母遺繫我獨無語之故且告之悔對曰闕

同掘地及泉隧而相見其誰曰不然公從之遂為母子

既知誓母之非乃隧而相見是遂過也特考叔用此

以曲恒莊公不可謂非錫類之一端耳

春秋左傳卷之四

卷之四

四

如初今許州襄城縣有鄭莊公城相傳為莊公見母處。

使宰咺歸魯侯仲子之賵撫鳳反。公羊傳：宰者何？官也。咺者何？名也。仲子者何？桓之母也。

何以不稱夫人？桓未君也。賵者何？喪事有賵。車馬曰賵，貨財曰賵。衣被曰襚。

此王室下交諸侯之始。

金氏履祥曰：左氏傳于隱公之篇多誤。如仲子之賵，誤以隱妻子氏之薨為仲子，故此以仲子為未薨。而王賵之為豫凶事也。考文之四年成風薨，五年王使榮叔歸含且賵，以此例之，歸賵當是惠公仲子俱歿之後。其歿在春秋之前。左氏蓋誤解矣。

祭伯鄭樵氏族畧。周公第七子封祭。杜預左傳注：陳留長垣縣有祭城。今直隸大名府長垣縣有祭城村。

如魯。

非王命也。此王臣私交之始。

酉辛五十有一年春二月己巳日有食之。

三月王崩孫林立是為桓王。

鄭祭足帥師入寇

鄭伯為平王卿士武公莊公世為王室卿士。平王貳于虢此南虢也。平王東遷。

虢仲之後徙于上陽，是為南虢。上陽城在今河南陝州。考路史虢有四：一曰西虢，仲所封；一曰東虢，叔所封；後為鄭滅；一曰南虢，仲之後所徙，其留岐者為小虢，後為秦滅，不在四虢之數；一曰北虢，亦仲之後，別為男爵。班固曰：北虢在大陽，是也。大陽，漢縣，故城在今解州平陸縣。鄭伯怨平王，于是周鄭交質。及是平王崩，王即位，將畀虢公政。四月，鄭祭足帥師取溫今河南懷慶府溫縣，有古溫城。周畿內溫邑。之麥。秋，又取成周注：見前。之禾。

武氏子求賻于魯武氏，周世卿。吳氏澂曰：子者，父老而以子稱行卿之事。

齊侯僖公祿父，獻公五世孫。鄭伯盟于石門在今山東濟南府長清縣西南水經注：水瀆流。

春秋左傳卷之四

卷之四

五

衛莊公不與金幣  
移久已  
淪圯

此諸侯特相盟之始。

桓王

元年衛州吁弑其君完莊公子桓公衛人殺州吁立晉是為宣公

初衛莊公娶齊女為夫人是為莊姜無子左傳莊姜美而無子衛人為之賦碩

人又娶陳女是為厲嬀生子蚤死陳女之娣是為戴嬀生子完莊

公立為世子公有嬖人生子曰州吁有寵而好兵公弗

禁石碻衛大夫姬姓衛靖伯之後諫公又弗聽碻子厚與州吁游碻

禁之不可莊公薨世子完立是為桓公石碻乃請老至是州

吁弑桓公而自立未能和其民史記州吁新立好兵衛人皆不愛厚問

于石碻碻曰王觀為可陳侯桓公鮑胡公滿十世孫方有寵于王

若朝陳使請必可得也厚從州吁如陳石碻使告于陳

曰此二人者實弑寡君敢即圖之陳人執之而請洧于

衛請衛人自臨討之衛人使右宰醜洧殺州吁于濮史記索隱濮在曹衛

之間賈逵言陳地非也石碻使其宰孺羊肩洧殺石厚于陳迎桓

公弟晉于邢周公之後今直隸順德府邢臺縣是而立之

甲子三年京師飢

告飢于魯魯為請糴于宋衛齊鄭

鄭伯入朝

鄭伯朝王王不禮焉怒其取麥禾故弗禮周公桓公黑肩言于王曰我

周之東遷晉鄭焉依善鄭以勸來者猶懼不饒其器反至也

况不禮焉鄭不來矣

乙丑四年使凡伯周公後為周卿士封凡聘于魯戎氏羗別國者杜預左傳註陳留濟陽縣有戎伐之楚邱衛地今曹州府曹縣邱亭以歸

初戎朝于周發幣于公卿發陳財幣于公卿凡伯弗賓至是凡伯聘魯還戎伐之于楚邱以歸

丙寅五年鄭以祊注見前易魯許田近許之田今河南許州有魯城本許田後置邑

鄭伯請釋泰山之祀天子有事于泰山諸侯皆從泰山之下諸侯各有湯沐邑鄭之邑在祊而祀周公成王營東都賜周公許田為魯朝宿之地

以別廟為疑故請已廢泰山之祀而為魯祀周公後世因立公別廟焉鄭欲易許田恐魯公于鄭鄭以天子不能復巡遂歸祊于魯後魯侯軌桓公

即位鄭復以璧假許田乃卒易之左傳桓公元年修好于鄭卒易祊田

范氏甯曰王室微弱無復方岳之會諸侯驕慢亦廢朝覲之事故鄭以湯沐之邑易魯朝宿之田也以號公忌父為卿士

金氏履祥曰鄭伯爭政之由桓王伐鄭之故

宋公齊侯衛侯盟于瓦屋周地今開封府洧川縣有瓦屋里

此參盟之始穀梁傳諸侯之參盟于是始胡氏傳春秋謹參盟

戊辰七年鄭伯以王命會齊侯魯侯伐宋

宋公不王不共王職鄭伯為王左卿士以王命告于齊魯遂

伐宋魯敗宋師于菅古頑反宋地鄭取郟宋邑在今曹州府城武縣是為南郟

及防今山東兗州府金鄉縣西防城是歸于魯是秋宋人衛人入鄭鄭不

設備二國乘虛入之蔡人從之伐戴今河南歸德府考城縣有故戴城周戴國鄭伯圍

戴克之取三師程子鄭戴合攻取三國之眾復以齊人入郟公羊作盛文王



子叔武封以郕不會王命也。不會伐宋之命。明年鄭以齊魯入

許。許莊公奔衛。許四岳後封。注見前。使許大夫百里奉許叔。莊公弟。後復入于許。

居許東偏。公孫獲。鄭大夫。居許西偏。今許州長葛縣有東西二城。即許叔與公

孫獲分處地。

李氏廉曰。傳言鄭伯為王左卿士。鄭之所以周旋王室。不過為矯假報復之私。非有夾輔之誠也。敗宋入郕。入許。志得意滿。而有繻葛之戰矣。

巳巳八年。魯公子翬弒其君息姑而立軌。是為桓公。

翬。字羽。請殺公子軌。將以求太宰。公曰。為其少故也。吾

將授之矣。使營菟裘。邑名。今兗州府泗水縣有菟裘城。吾將老焉。羽父

懼。反譖公于軌。而請弒之。公祭鍾巫。公為公子時。為鄭主鍾巫。遂與尹氏歸。而立其主。館于寯氏。魯大夫。羽父使賊弒公立軌而

討寯氏。

討寯氏

辛十年。宋督。華父督。宋戴公孫。弒其君與夷。殤公。及其大夫孔父

孔子六世祖。

初。宋宣公。名力。武卒。舍其子與夷而立弟和。是為後穆公。

公疾。召大司馬孔父而屬與夷焉。使奉之。孔父曰。羣臣

願奉馮也。馮。穆公子。公曰。不可。使馮出居于鄭。遂卒。與夷立

孔父為司馬。督為太宰。十年十一戰。民不堪命。督宣言

曰。司馬則然。遂殺孔父。并弒殤公。召公子馮于鄭而立

之。是為莊公。公羊傳。督將弒殤公。以孔父生而于殤公不可得而弒。于是先攻孔父之家。殤公救之。皆死焉。

魯侯會齊侯陳侯鄭伯于稷。宋地。以成宋亂。成。平也。有亂。故為會欲

以平之。

宋以郟國名文王之後是為北郟注見前大鼎賂魯侯齊陳鄭皆有賂

于是立華氏督遂相宋公魯取郟大鼎納于太廟臧孫

達魯孝公子彊字子臧是為僖伯其後以臧為氏子達是為哀伯諫不聽

蔡侯鄭伯會于鄧今許州鄧城縣鄧城是

始懼楚也

王十有一年晉曲沃敗晉師于汾隰汾水之邊左傳疏汾水出太原故汾陽縣

東南至河東汾陰縣入河故汾陽今山西忻州靜樂縣汾陰今山西蒲州府榮河縣獲晉侯哀侯

晉欒成靖侯孫欒賓子賓食采于欒以邑為氏故城在今直隸趙州西北死之

晉侯侵陘庭今山西平陽府翼城縣東南有陘庭城志云即陘庭也之田陘庭南

郟啟曲沃伐翼即翼城晉所都曲沃伯稱即武公邑伯子逐晉侯于汾

隰夜獲之及欒成諡其叔稱止之曰苟無死吾以子見天

子令子為上卿制晉國之政辭曰民生于三事之如一

父生之師教之君食之惟其所在則致死焉遂鬪而死

時晉人立哀侯于小子為君是為小子侯小子侯元年曲沃武公使韓萬弑哀侯四年武公誘小子侯而殺之

號公林父以王命立哀侯之弟緡于晉是為侯緡韓萬曲沃桓叔子食采韓原因以為氏

秋七月王辰朔日有食之既

甲戌十有三年蔡人衛人陳人從王伐鄭

王奪鄭伯政鄭伯不朝王以蔡人衛人陳人伐鄭鄭伯

禦之為魚麗之陳先偏後伍伍承彌縫司馬法車戰二

車居前以伍次之承偏之隙而彌縫闕漏也五人為伍此蓋魚麗陳法戰于緡葛鄭地或

葛也今長葛縣屬許州蔡衛陳皆奔王卒亂鄭師攻之王卒大敗

祝聃射王中肩王亦能軍殿而不奔祝聃請從之鄭伯曰君

緡葛之戰春秋大變也鄭於周室最親密邇畿甸當率先諸侯以奉王命乃因王與虢公政輒興師入寇又拒王逆戰無君之罪若矣故謂鄭莊為春秋之首寇也

子不欲多上人。况敢陵天子乎夜。鄭伯使祭足勞王。且問左右。

乙亥十有四年。北戎即山戎伐齊。鄭世子忽帥師救之。遂敗戎師。

先是北戎侵鄭。鄭人敗之。鄭為三覆以待戎。戎人之前遇覆者奔。視聃逐之。袁戎師前後擊之。及是。戎復伐齊。齊侯使乞師于鄭。鄭世子忽帥師救齊。大敗戎師。獲其二帥大良。少良。甲首被甲者首三百。以獻于齊。初。魯侯未昏于齊。齊侯欲以其女即文姜。魯桓公夫。妻忽。忽辭。人問其故。忽曰。人各有耦。齊大。非吾耦也。及敗戎師。齊侯又請妻之。固辭。人問其故。忽曰。無事于齊。吾猶不敢。今以君命奔齊之急。而受室以歸。是以師

昏也。人其謂我何。祭仲曰。君多內寵。子無大援。將不立。三公子子突。子儀。子貜皆君也。弗從。

丙十有五年。遷盟。左傳注。盟津也。盟津。即孟津。注見前。向今懷慶府濟源縣。向城是。之民于邾。即邾。邾。即邾。注亦見前。

盟。向求成于鄭。王之八年。以蘇忿生之田十二邑。易鄭田。盟。向其二邑也。不肯。即鄭。至是而始求成焉。既而背之。背鄭。歸王。鄭人。衛人。伐盟。向王遷其民于邾。

丁十有六年。楚僭稱王。楚自熊渠入傳。為若敖。若敖再傳。為蚡冒。蚡冒之弟熊通。弑蚡冒。子而自立。始僭號稱王。

楚子熊通伐隨。姬姓。侯爵。今湖北德安府隨州。春秋隨國。俾請王室尊其號。隨為固。請王不許。熊通怒。曰。吾先鬻熊。文王之師也。成

春秋左傳卷之四

王舉我先公。令居楚蠻夷率服。而王不即位。我自尊耳。乃自立為王。是為楚武。考金氏前編。于楚僭號。以後諸君始立之初。則書是為某。分注之處。則書楚某。皆削王存諡。以別于周天子。今依之。其引用左國史記諸書。則仍從原文稱王。與隨人盟而去。後周召隨侯。莊王七年。數以立楚為王。楚以隨背已。伐隨熊通。卒于師。子熊賁立。是為楚文。左傳。楚武王伐隨。敖屈重。除道梁澆。營軍臨隨。隨人懼。行成。莫敖以王命入盟。隨侯而還。楠木。山名。在今湖北安陸府鍾祥縣。東。今尹。莫敖。楚官名。鬬氏。屈氏。皆楚公族。以邑為氏。澆水名。出今湖北德安府隨州西北。下流入沮水。

十有九年。鄭伯寤生卒。鄭莊公卒。嫡庶爭立。逾二十年。今依俞氏臯敘說彙輯。而以左傳作注。

鄭莊公娶鄧曼。鄧國。曼姓。今湖北襄陽府襄陽縣。有鄧縣。故城。春秋鄧國地。生世子忽。是為昭公。又納宋雍氏女。曰雍姑。生子突。是為厲公。又生子豎

子儀。莊公卒。忽立。甫四月。突自宋入于鄭。忽出奔。雍氏。宗有。寵于宋。誘祭仲而執之。使之立突。祭仲乃以厲公歸而立之。昭公奔衛。後祭仲逐突。祭仲公使其壻雍糾殺之。雍姬告仲。仲殺糾。厲公奔蔡。尋入居于櫟。事在王二十三年。櫟。鄭邑。即陽翟。注見前。

忽復立。高渠彌弑之。立子亶。初。莊公將以高渠彌為卿。懼其殺已。遂弑之。與祭仲。齊人殺子亶。齊侯師于首止。共立子亶。事在莊王二年。齊人殺子亶。子亶會之。高渠彌從祭仲稱疾不往。齊人殺子亶。而轅高渠彌。事在莊王三年。首止。衛地。今歸德府睢州。有首鄉。劉昭曰。首止。祭仲立子儀。子儀立十四年。祭仲死。突使傅瑕殺之。而復入。厲公自櫟侵鄭。獲傅瑕。傅瑕請納公。遂與之盟。傅瑕殺子儀及其二子。而納厲公。厲公人。遂殺傅瑕。事在僖王二年。

甲二十有三年。使家父如魯求車。公羊傳。王者無求。求車非禮也。

王崩。子佗立。是為莊王。

春秋左傳卷之四

七

按史記宣公十八年納伋妻宣公生壽及朔即於其年朔議殺壽爭死是則讒者爭死者皆甫生數月之子為情理所必無且宣公死後宣姜亦幾老而左傳所云齊人使昭伯悉於宣姜不可強之而後生三女二男既已失節之淫婦又何待強而老婦連生五子又必無之事紀載家失實傷理實有甚於此者故為之考證如右

莊王

乙酉元年衛侯朔出奔齊

初衛宣公悉于夷姜宣公庶母生急子急詩序史屬諸右公

子為之娶于齊而美公取之是為宣姜詩序邶風新臺

河上而要之國人生壽及朔屬壽于左公子

惡之而作是詩左右公子夷姜縊夫人即宣姜與朔構急子公

子蓋宣公之兄弟也今山東東昌府莘縣有莘亭故城春秋衛地使諸齊使盜待諸莘莘亭故城春秋衛地壽告急子

使行不可壽飲以酒載其旌以先史記宣公與伋白旌告盜日見持白旌者

殺盜殺之急子至日我之求也請殺我盜又殺之詩序

之二子乘舟思飲壽也宣公之二子交左右公子故怨朔

相為死國人傷而思之作是詩也宣公之二子交宣公卒朔立是為惠公四年左公子洩右公子職攻衛侯立

公子黔牟衛羣公子衛侯奔齊

丁亥三年魯侯與夫人姜氏如齊齊人殺魯侯

魯侯及姜氏如齊齊侯襄公諸兒通焉史記襄公故嘗

與桓公來襄公復通焉詩序齊風南山刺襄公也鳥獸

之行淫乎其妹又徹笱刺文姜也齊人惡魯桓公微弱

不能防閑文姜使至公謫之以告齊侯享公使公子彭

生乘公公薨于車史記齊襄公享公公醉使公子魯人

告于齊曰寡君來修舊好禮成而不反無所歸咎惡于

諸侯請以彭生除之齊人殺彭生魯立桓公子同是為

姜氏會齊侯于禚齊地于防魯地注于穀齊地今山東

縣穀城是文享之子祝邱魯地今山東沂州府蘭山縣

襄公無禮義盛其車服疾驅于通道大都與文姜淫播

其惡于萬民焉又猗嗟刺魯莊公也不能以禮防閑其

此卷之周莊王

母失子之道人以為齊侯之子焉。

周公黑肩謀弑王伏誅。

周公欲弑王而立王子克。莊王弟辛伯周大夫告王遂與

王殺周公子克奔燕。燕南燕姑姓今衛輝府延津縣南燕故城是初子儀有

寵于桓王桓王屬諸周公辛伯諫曰並后妾如匹嫡庶

嫡兩政。臣擅耦國都如亂之本也周公弗從故及。

戊子四年使榮叔周大夫榮氏叔字錫魯桓公命追命以褒之

王姬歸于齊。

王使單伯文獻通考單姬姓伯爵國在畿內世為王卿士送王姬送公羊穀梁

為魯大夫魯築王姬之館于外天子嫁女于諸侯使諸侯同姓者主之魯侯奉

命主王姬之婚方在諒闇故築舍于外王姬歸于齊尋卒。

單伯送王姬公穀作逆釋春秋者辨論紛如今按魯世卿無單氏而王朝有單伯單子此單伯即後魯伐宋之單伯也釋此則是送

非逆不辨而自明

孫氏覺曰齊為魯世讐而魯土其婚又在衰經之中不書王姬之歸無以見魯之失禮王之失命也。

卯七年紀侯大去其國。左傳注大去者不反之辭。

齊人遷紀邢。漢書作餅今山東青州府臨朐縣餅縣故城是部今山東萊州府

是部。今青州府安邱縣部城故城是紀季以鄰戶圭反今青州府臨淄縣鄰亭是入于

齊。左傳疏釋例齊侯鄭伯詐朝于紀以襲之紀人大懼謀難于魯請王命以求成于齊魯告不能齊遂偪之

遷其三邑紀有旦夕之危紀侯不能下齊以與紀季于

故分季以鄰請事于齊。釋例紀侯自以列國不忍屈臣于齊以國與季脫身外寓社稷有奉故不言滅不見

是大去其國。與季脫身外寓社稷有奉故不言滅不見

迫逐故違齊難也。違去

陸氏淳曰失國而曰大去何也紀侯賢而無罪怙力者并之故力不足者君子不咎之不日出奔所以護紀惡

壬辰八年冬齊人宋人魯人陳人蔡人伐衛。

周莊王

衛侯朔居齊八年。至是齊侯會諸侯以納之。

巳九年春。王使子突救衛。

王人子突救衛。弗克。朔遂入于衛。殺左右八子。洩而復

立黔牟奔于周。

甲十年。夏四月。辛卯夜。恒星不見。夜中。星隕如雨。左傳注

則上言夜者。夜未至中。謂初昏之後耳。非竟夜不見星也。

乙十有一年。齊無知弑其君諸兒。

齊侯使連稱管至父。二人。皆齊大夫。戍葵邱。此齊葵邱。在青州府臨淄縣西。瓜

期而往。曰。及瓜而代。期戍。公問不至。請代。又弗許。二人

怒。因公孫無知以作亂。僖公母弟夷仲年。生無知。有寵于僖公。衣服禮秩如適。襄公結

之故二人。遂弑襄公。公遊姑楚。遂田貝邱。見大豕。從者因之作亂。遂弑襄公。曰。公子彭生也。公怒射之。豕人立

而啼。公懼。墜于車。傷足。喪屨。誅屨于徒人費。鞭之見血。費走出。遇賊于門。賊劫之。費袒而示之背。請先入。伏公

而出鬪。死于門中。賊遂入。見公之足于戶下。遂弑之。

姑楚。即薄姑。注見前。貝邱。齊地。今青州府博興縣南。有

貝中而立無知。

丙十有二年。齊人殺無知。公子小白立。是為桓公。

無知嘗虐于雍廩。史記作雍林。賈逵曰。渠邱大。今臨淄縣有渠邱亭。既立。雍

廩殺無知。初。襄公立。無常。鮑叔牙。齊大夫。以曰。君

使民慢亂。將作矣。奉公子小白。僖公庶子。奔莒。嬴姓。國。子亂

作管夷吾。史記。賴上人。氏族略。夷吾出自周穆王。召忽奉公子糾。小白庶兄。奔

魯。魯聞無知死。伐齊。納子糾。小白已自莒先入。史記。齊

侯先陰召小白于莒。魯納子糾。使管仲遮莒道。射中小

白帶鉤。小白佯死。管仲使人馳報魯。魯送糾者行。益遲。

至齊。則小白已入。高偃立之。高發兵拒魯。戰于乾時。

管仲制國大槩本於周禮而行之以權便蓋限於時勢不得不然至山高乘馬準輕重而權穀幣儒者謂其漸開申商之學似矣然虛國強兵霸佐之才所就

固宜如是而已較之空談仁義流弊如朱襄者不更可嗚耶

徐世昌

乾音干。齊地。左傳注。時水支流。旱則竭。故曰乾時。時水。在今青州府博興縣南。魯師敗走。鮑叔牙帥師言于魯曰。子糾親也。請君討之。管召。讐也。請

受而甘心焉。乃殺子糾于生竇。史記作笙瀆。賈逵曰。句

荷澤。召忽死之。管仲請囚。魯語。齊桓公使請管仲于魯

子。天下之才也。所在之國。必得志于天下。請殺而以屍

授之。莊公將殺仲。齊使者請生致之。莊公遂束縛以與

齊。鮑叔受之。及堂阜。齊地。在今沂州府蒙陰縣西北。而稅。同脫。之。左傳

陰有夷吾亭。鮑叔解夷吾縛于此。

齊以管夷吾為相

鮑叔以管仲至齊。三釁。以香薰。三浴之。齊侯親逆于郊。

與之坐而問焉。對輒稱善。乃以為相。號曰仲父。仲為政。

四民不使雜處。國語。管子對桓公曰。四民者雜處。則其

工就官府。處商就市井。處農就田野。少而習焉。其心安焉。不見異物而遷焉。是故其父兄之教。不肅而成。子弟

之學。不制國為二十一鄉。國語。管子制工商之鄉六。士

勞而能。制國為二十一鄉。國語。管子制工商之鄉六。士

五鄉。高子帥五鄉。士作內政。國語。管子制五家為軌。軌為

政。若有征伐。鄰國不知也。國語。管子制五家為軌。軌為

之長。十軌為里。里置有司。四里為連。連為之長。十連為

鄉。鄉有良人焉。以為軍令。五家為軌。故五人為伍。軌長

帥之。十軌為里。故五十人為小戎。里有司帥之。四里為

連。故二百人為卒。連長帥之。十連為鄉。故二千人為旅。

鄉良人帥之。五鄉一帥。故萬人為一軍。五鄉之帥帥之。

伍之人。世同居。少同遊。故夜戰聲相聞。足以不乖。晝戰

日相視。足以相識。其權欣足以相死。居同樂。行同和。死

同哀。是故守則官山海以準輕重。管子對曰。惟官山海

可耳。謹鹽筴與鐵官之立。三選以擇賢。國語。鄉長進賢

數。其餘輕重準此而行。立三選以擇賢。公親見之。遂使

即七宋天直監管

五



御批歷代通鑑輯覽卷之四

重農以權穀幣。管子書粟重而萬物輕粟輕而萬物重兩者不衡立故殺去商賈之利而益農夫之事則田野闢而農勸其事又曰穀為君幣為下贖故五穀粟米者民之司命黃金刀布者民之通貨罪以備器械管子書因罰備器械制重罪贖以犀甲一以鑄鉏夷斤欄厚聘幣反侵地國語桓公曰吾欲從驟聘賴于諸侯則四鄰之國親矣以親諸侯齊侯悉從之故仲得盡其才而伯功立

丁酉十有三年魯敗齊師于長勺。魯地春秋彙纂路氏曰成王以商民六族錫魯公有

長勺氏此商民所居也

齊伐魯魯侯將戰曹劌魯人請從公與之乘戰于長勺公將鼓之劌曰未可齊人三鼓劌曰可矣齊師敗績公將馳之劌曰未可下視其轍登軾而望之曰可矣遂逐

齊師既克公問其故對曰夫戰勇氣也一鼓作氣再而衰三而竭彼竭我盈故克之夫大國難測也懼有伏焉吾視其轍亂望其旗靡故逐之

楚敗蔡師于莘。蔡地在今河南汝寧府汝陽縣以蔡侯獻舞。哀侯蔡仲歸十世孫

蔡侯娶于陳息侯。今河南光州息縣有古息里即息侯國亦娶焉息媯將

歸過蔡蔡侯止而見之弗賓息侯聞之怒使告楚曰伐我我求救于蔡而伐之楚子從之敗蔡師于莘執蔡侯以歸。史記楚世家文王伐蔡虜哀侯已而釋之蔡侯繩也。譽也息媯以語楚子楚子如息以食入享遂滅息而納息媯息媯不言楚子問之對曰吾一婦人而事二夫縱不能死又奚言楚子以

蔡侯滅息遂復伐蔡入之。邵子經世書自是江漢之國皆服于楚

御批歷代通鑑輯覽卷之四 周莊王 七

齊師滅譚。今山東濟南府歷城縣有譚城古譚國。

齊侯之出也。過譚。譚不禮焉。及其入也。諸侯皆賀。譚又

不至。齊師滅譚。譚子奔莒。

陳氏傳良曰。滅國始于此。春秋滅國三十六。五伯為之也。

已十有五年。王崩。子胡齊立。是為僖王。

宋萬弑其君捷。莊公馮之子。閔公。及其大夫仇牧。

初。宋伐魯。戰于乘邱。魯地。故城在今山東兗州府滋陽縣西北。魯侯以金僕

姑。矢名。射南宮長萬。宋大夫。公右欸孫生搏之。搏。取也。宋人請

萬。萬歸。宋公靳之。戲而相。鬼曰靳。曰。始吾敬子。今子魯囚也。萬

病之。遂弑閔公于蒙澤。今河南歸德府商邱縣蒙縣故城是。遇仇牧于門。

批而殺之。公羊傳。萬與閔公博。婦人皆在側。萬曰。甚矣。曾侯之美也。天下諸侯宜為君者。曾侯耳。閔

公矜此婦人。妬其言。顧曰。此虜也。爾虜焉。故魯侯之美惡乎至。萬怒。搏閔公。絕其脰。仇牧聞君弑。趨而至。遇之于門。手劍而叱之。萬臂擲。仇牧碎其首。齒著乎門闕。遇大宰督于東宮之西。又殺之。立子游。

宋之公子。羣公子奔蕭。宋邑。今江南徐州府蕭縣故蕭城是。公子御

說。莊公奔毫。即毫城。南宮牛。萬之子。猛獲。萬之黨。帥師圍毫。

蕭叔大心。蕭大夫。及戴武。宣穆莊之族。以曹師伐之。武王

鐸封曹。殺南宮牛于師。殺子游于宋。立御說。是為猛獲。

注見前。奔衛。萬奔陳。宋人請猛獲于衛。亦請萬于陳。以賂歸。皆

醢之。陳使婦人飲萬酒。而以犀革裹之。比及宋。手足皆見。

僖王

庚子元年。齊侯。宋人。蔡人。邾人。邾國。曹姓。注見前。會于北杏。齊地。在今山東

泰安府東阿縣北。

即北杏。置管覽。卷之四。周僖王。

宋有弑君之亂。齊侯欲修伯業。會于北杏以平之。齊桓公會之。

胡氏安國曰。春秋之世。以諸侯而主天下會盟之政。自北杏始。其後宋襄。晉文。楚莊。秦穆。交主夏盟。跡此而為之者也。

齊人滅遂。舜之後。今兗州府寧陽縣北有遂鄉。春秋遂國。

北杏之會。遂人不至。齊滅遂而戍之。後遂人飲戍者酒。醉而殺之。齊人殲焉。

魯侯會齊侯盟于柯。左傳注。此柯濟北東阿。齊之阿邑。猶祝柯。今為祝阿。今兗州府陽穀縣東。

北。有阿城鎮。即春秋齊阿邑。

魯侯將盟曹沫。左傳疏。曹劌。史記作曹沫。以匕首劫齊侯于壇上。曰。反魯之侵地。公許之。曹沫去匕首。北面就臣位。公後悔。

欲無與魯地。而殺曹沫。管仲曰。棄信于諸侯。不可。于是歸地于魯。諸侯聞之。皆信齊而欲附焉。公羊傳。齊桓之信。著乎天下。自

柯之盟始。

辛丑二年。命單伯會諸侯。齊陳伐宋。

宋人背北杏之會。諸侯伐宋。齊侯請師于王。王命單伯會之。取成于宋而還。

單伯會齊侯。宋公。衛侯。鄭伯于鄆。衛邑。今曹州府濮州鄆城故城是。

宋服故也。齊桓公衣裳之會二。

壬寅三年。齊侯。宋公。陳侯。衛侯。鄭伯會于鄆。

齊始霸。故諸侯復會焉。齊桓公衣裳之會三。

癸卯四年。命曲沃伯稱為晉侯。

從其居不之金重

曲沃伯伐晉侯緡滅之。盡以其寶器賂王。王使虢公命

曲沃伯以一軍為晉侯。自桓叔始封曲沃。至是凡六十七年。

夏。宋人、齊人、衛人伐鄭。冬。齊侯、宋公、魯侯、陳侯、衛侯、鄭伯

許男。莊公弟穆公新城。滑伯。今河南河南府偃師縣。有緡氏故城。春秋滑國。滕子。文王子叔繡封

滕。注。見前。同盟于幽。宋地。在今河南歸德府考城縣界。

鄭人侵宋。諸侯為宋故伐鄭。冬。同盟于幽。鄭成也。齊桓公會四。

裳之

楚滅鄧。鄧國。注。見前。

初。楚子伐申。過鄧。鄧侯曰：吾甥也。止而享之。騶甥、聃甥

養甥。皆鄧之甥。仕于舅氏。請殺楚子。曰：亡鄧國者必此人也。若不

早圖。後君噬臍。何及。若嚙腹臍。喻不可及。鄧侯弗從。還年。伐申還之。

楚于伐鄧。至是滅之。

為國。周大夫。亦周大夫。以晉師殺夷詭諸。夷。采地名。周公忌父出奔虢。

初。曲沃伯伐夷。執夷詭諸。為國請而免之。既而弗報。詭諸不報施。

故為國作亂。謂晉人曰：與我伐夷。而取其地。遂

以晉師伐夷。殺夷詭諸。周公忌父出奔虢。避為國之難。後惠王立。復之。

甲辰五年。王崩。太子閔立。是為惠王。

秦徙都雍。今陝西鳳翔府鳳翔縣有雍縣。故城。元和志。春秋時秦都。

初。秦寧公。文公孫。自汧渭之間。徙居平陽。今鳳翔府岐山縣。平陽故城是。

至是德公立。寧公公子。武公弟。徙雍。居大鄭宮。以犧三百牢。祠鄜

時。初。作伏祠。孟康曰：六月伏日也。周時無至此。乃行之。師古曰：伏者。謂陰氣將起。迫于殘陽。而未

周僖王

七

得升故為藏伏因名伏日也立秋後以金磔狗邑四門  
代火金畏于火故至庚日必伏庚金也  
以禦蠱蠱者熱毒惡氣狗陽畜故磔以禦之

惠王

元年春三月日有食之

號公晉侯來朝

王饗醴命之肴有物以助勸敬皆賜玉五穀音角亦作珏雙玉也

馬三匹左傳非禮也王命諸侯名位不同禮亦異數不以禮假人

使原伯文王第十六子封原今懷慶府濟源縣古原城是也其後世為王室卿士逆后于陳陳

媯歸于京師是為惠后

號晉朝王鄭伯以齊執其卿鄭不朝齊齊人執鄭管求王為援亦

在周倡義為王定昏使原伯逆王后于陳陳媯歸于京

師

金氏履祥曰三年之喪自天子達號音不能以禮導王而亟為迎昏非禮矣

丙二年為國邊伯詹父子禽祝跪五大夫以王子頹作亂

初王姚莊王妾嬖于莊王生子頹子頹有寵為國為之師

及王即位取為國之圃以為囿邊伯之官近于王宮王

取之又奪子禽祝跪與詹父田而收膳夫石速也之秩故

為國邊伯石速詹父子禽祝跪作亂因蘇氏司寇蘇忿生食采于

温亦曰蘇城其後為王卿士桓王八年以蘇之十二邑與鄭故怨秋五大夫石速為士不在五大

夫奉子頹以攻王不克出奔温蘇子奉子頹奔衛衛人

燕人南燕也來寇立子頹

丁三年王居于櫟注見前

鄭伯和王室不克執燕仲父南燕伯遂以王歸王處于櫟

秋王及鄭伯入于鄆桓王時所取鄭邑今河南府偃師縣鄆聚是遂入成周

取其寶器而還

戊申

四年號公鄭伯奉王歸于王城誅子頹及五大夫

號公鄭伯宵命于弭鄭地在今開封府密縣界同伐王城鄭伯將王

自圍門入號叔自北門入殺子頹及五大夫王與鄭伯

武公之畧也界也自虎牢以東鄭武公傅平王平王賜之虎牢以東後失其地故王復與

之虎牢卽制邑周穆王時有高奔戎生捕虎于葭中而獻之王王命之爲柙畜之東虞是爲虎牢後名成臯

故城在今開封府汜水縣子提立是王巡號守巡守號

公爲王宮于珽號地在今河南府滎池縣界王與之酒泉春秋彙纂

今陝西同州有甘泉水出王與之酒泉酒泉周邑

西巳五年陳人殺其公子禦寇公子完奔齊是爲田齊之祖

初陳厲公名佗桓公弟生完周史有以周易見陳侯者陳侯

使筮之遇觀之否曰是謂觀國之光利用賓于王此其

代陳有國乎不在此其在異國非此其身在其子孫光

遠而自他有耀者也若在異國必姜姓也姜大嶽之後

也山嶽則配天物莫能兩大陳衰此其昌乎至是陳人

殺太子禦寇史記陳宣公有嬖姬生子款欲立之禦寇

素愛完完懼禍及已乃奔齊齊侯使爲卿辭曰羈旅之

臣幸若獲宥君之惠也敢辱高位乃使爲工正完之奔

齊始易陳氏爲田氏史記正義完既奔齊不欲稱本國故號故改陳爲田完卒諡敬仲

楚熊惲弑其君麇卽杜敖楚文子而自立是爲楚成

杜敖欲殺其弟熊暉。暉奔隨，遂與隨襲弑杜敖而代其位。

庚戌六年，楚人入獻，賜楚子胙。

熊暉初即位，布德施惠，結好于諸侯。春秋書荆人來聘，公羊傳始能聘也。

使人入獻于天子，天子賜胙。曰：鎮爾南方，夷越之亂，無

侵中國。

壬子八年，夏六月，辛未朔，日有食之。

晉侯武公子獻盡殺其羣公子。

晉桓莊之族逼。曲沃桓叔莊伯之子孫。晉侯患之，士為周杜伯子

謀，以官為氏。曰：去富子。二族之富強者。則羣公子可謀也。已，晉

侯曰：爾試其事。士為與羣公子謀，譖富子而去之。又使

殺游氏之二子。亦桓莊族。告晉侯曰：可矣。不過二年，君必無

患。士為使羣公子盡殺游氏之族。城聚。晉邑，即南絳故城，在今山西絳

州絳縣亦曰車箱城。而處之。于是晉侯圍聚，盡殺羣公子。以士為

為大司空，城絳。武公所都，故城在今絳州北。以深其宮。羣公子或亡

奔號，號以故再侵晉。晉侯欲伐之，士為曰：不可。號公驕，

若驟得勝于我，必棄其民，無眾而後伐之。欲禦我，誰與

且亟戰，將饑。

癸丑九年，冬，十有二月，癸亥朔，日有食之。

甲寅十年，齊侯、宋公、魯侯、陳侯、鄭伯同盟于幽。

陳鄭服也。齊桓公衣裳之會五。

乙卯十有一年，齊人伐衛，衛人及齊人戰，衛人敗績。

王使伯廖命為錫齊侯命方伯且使伐衛以其立子

頹也于是齊侯伐衛戰敗衛師數之以王命取賂而還

高氏閔曰衛助子頹篡王齊為伯主不能奔救及鄭伯既納王錫齊侯命使討之于是乎伐衛曰伐者討得其罪也然既敗衛乃取賂而還嗟夫齊桓以能獎王室霸諸侯而所為乃若此

秋楚伐鄭齊人宋人魯人救鄭

楚令尹子元楚文伐鄭入于桔柣之門鄭遠郊門子元鬪禦

疆鬪梧耿之不比為旆子元自與三子鬪班若敖特建旆以居前王孫

游王孫喜殿衆軍入自純門鄭外郭門及達市鄭郭內市縣門不

發楚言而出鄭示楚開眼故不閉城門出兵而效楚言子元曰鄭有人焉諸

侯救鄭楚師夜遁

十有三年命虢公討樊注見前執樊皮以歸

樊皮叛王王命虢公討之夏四月虢公入樊執樊仲皮歸于京師

秋九月庚午朔日有食之

齊人伐山戎

山戎伐燕北燕召公之後注見前燕告急于齊齊侯救燕遂伐山

戎至于孤竹注見前而還燕君送齊侯遂入齊境齊侯曰

非天子諸侯相送不出境吾不可以無禮于燕于是分

溝割燕君所至與燕史記正義滄州長蘆縣有燕留城即齊桓公分溝割燕君所至地長

蘆今直隸天津府命燕君復修召公之政納貢于王如成康

之時諸侯聞之皆從齊管子書桓公未至卑耳之溪十里見八長尺而人物具冠右袪

衣公問管仲仲曰登山之神有俞兒者伯王與則見袪衣示前有水也右袪示從右涉也至卑耳之溪有贊水



者曰從左方涉其深及冠從右方涉其深及膝乃右涉  
韓非子桓公自孤竹反逃失道管仲曰老馬之智可用  
也乃放老馬而隨之遂得道山中無水隰朋曰蟻冬居  
山之陽夏居山之陰蟻壤一寸而仞有水乃掘地得水  
楚人殺令尹子元以鬪穀奴走切於菟音烏為令尹即子文

子楚人謂乳曰穀謂虎為於菟  
子文初生于邳虎乳之故名

初子元欲盡文夫人即息媯為館于其宮側而振

萬焉振動萬舞也夫人聞之泣曰先君以是舞也習戎備也

今令尹不尋諸仇讐而于未亡人之側不亦異乎御人

以告子元于是子元伐鄭既歸而處王宮鬪射師即鬪

子諫執而梏之申公鬪班遂殺子元鬪穀於菟為令尹

自毀其家以紓楚國之難

未已十有五年魯侯同卒慶父弒其君之子般而立啓方史記

作開莊公少  
子是為閔公

初魯侯築臺臨黨氏魯大夫見孟任黨氏女從之音秘不

以夫人許之割臂盟公生子般祭各首夏祭天祈雨講于黨氏

女公子般之妹觀之圉人犖自墻外與之戲子般鞭之公

曰不如殺之犖有力焉公疾問後于叔牙史記莊公有

父次日叔牙對曰慶父材季友以君命酖叔牙曰飲此則

公曰鄉者牙曰慶父材季友以君命酖叔牙曰飲此則

有後于魯國不然死且無後飲之卒立叔孫氏公薨子

般即位次于黨氏慶父使圉人犖賊子般于黨氏季友

奔陳慶父立啓方史記莊公娶齊女曰哀姜無子其姊

其姊之子故殺  
般而立子開

庚申十有六年晉滅耿周同姓國漢書地理志河東郡皮氏有耿鄉故耿國皮氏今絳州河津

縣霍即霍叔邑魏亦周同姓國元和志古魏城在芮城縣注見前委北今山西解州芮城縣東北有河北故

城也即魏封趙夙造父之後于耿畢萬畢公之後于魏

晉侯作二軍公將上軍太子申生將下軍趙夙御戎畢

萬為右以滅耿滅霍滅魏還為太子城曲沃賜趙夙耿

賜畢萬魏以為大夫士蔣曰太子不得立矣分之都城

而位以卿先為之極又焉得立不如逃之為吳泰伯不

亦可乎卜偃晉掌卜曰畢萬之後必大萬盈數也魏大

名也以是始賞天啓之矣萬之後為戰國魏

辛酉十有七年魯慶父弑其君啓方季友立公子申是為誅

慶父

魯侯立請于齊召季友季友自陳來歸公之傅奪卜齧

夫魯大田公弗禁慶父使卜齧賊公于武闈宮中門季友

以子申適邾申閔公庶慶父奔莒史記魯人欲誅慶父

入立之以賂求慶父于莒莒人歸之及密左傳注密魯

北有密如亭費縣乃益其後為仲孫閔公之死哀姜

與知之史記閔公二年慶父與哀姜通故孫于邾齊人

殺之于夷魯地以其尸歸魯人請而葬之

狄入衛狄史記作翟黃帝之裔處北地後徙

狄人伐衛衛侯懿公赤好鶴有乘軒者將戰國人受甲

者皆曰使鶴戰于柴澤左傳注此柴澤當在河北衛師敗績遂滅衛

宋公桓公御說迎衛之遺民渡河立昭伯之子申是為廬

于曹詩作漕通典滑州白馬縣衛漕邑齊侯使公子

無虧帥車三百乘甲士三千人戌曹史記自惠公朔讓

公衛人不服嘗欲敗之狄殺懿公衛人思立伋後伋子

已死彼同母弟二人其一曰黔牟嘗立八年又去其二

戊壬已死故立昭伯子申十有八年齊師宋師曹師次于聶北今山東東昌府聊

城縣有聶城齊西邢地救邢邢遷于夷儀故城在今直隸順德府邢諸侯城

邢臺縣西俗謂之隨宜城

狄伐邢諸侯救邢邢人潰出奔師師遂逐狄人具邢器

用而遷之師無私焉夏邢遷于夷儀諸侯城之

楚人伐鄭春秋于是年鄭即齊故也

荆始書楚

齊侯宋公魯侯鄭伯曹伯昭公斑叔振會于榿左傳

春秋彙纂榿即榿也今河南陳州

謀救鄭也齊桓公衣

十有九年諸侯城楚邱今衛輝府滑縣東有衛南廢縣

即齊桓公為衛所築地非戎伐

齊侯率諸侯城楚邱以封衛衛戴公卒齊侯立其弟燮

為衛君是為齊侯既遷邢于夷儀又封衛于楚邱邢遷

如歸衛國忘亡詩序衛風木瓜美齊桓公也衛國有狄

人之敗出廬于漕桓公救而封之遺之

車馬器服衛人思厚衛侯大布之衣大帛之冠務材訓

報之而作是詩也農通商惠工敬教勸學授方任能元年革車三十乘季

年乃三百乘詩疏文公徙居楚邱始建城使民安處建

齊桓公遷邢封衛一時危  
者晏而亡者存孔子以仁  
許管仲在此孟子謂五霸  
假之亦在此

既富饒官亦充足百姓美之為作定之方中詩

齊侯宋公江人左傳注江國在汝南安陽縣安黃人今陽故城在今河南汝寧府正陽縣

南光州春秋黃今山東曹州府曹縣有蒙澤故城古貫邑貫與貫字相似故蒙澤城

亦曰貫城

江黃楚與國始來服故為合諸侯明年又會于陽穀今州府陽穀縣

謀伐楚歷代年表貫及陽穀之會不在九合之數

甲二十年楚人伐鄭

先是楚人侵鄭鬬章楚大夫囚鄭聃伯至是復伐鄭鄭伯

欲成孔叔鄭大夫曰不可齊方勤我棄德不祥

乙二十有一年春齊侯宋公魯侯陳侯衛侯鄭伯許男曹

伯侵蔡蔡潰遂伐楚次于陘今許州鄆城縣陘亭是楚屈完楚大夫來

齊帥諸侯伐楚仗義執言  
楚服論者謂召陵之盟  
庶幾王者之事則過情矣

盟于師盟于召陵

今鄆城縣東有召陵故城即屈完來盟地

齊侯以諸侯之師侵蔡史記桓公與蔡姬戲舟中蔡姬歸蔡姬未絕蔡嫁其女蔡潰遂伐楚楚子使問師故管

仲對曰昔召康公命我先君太公曰五侯九伯女實征

之以夾輔周室爾貢包茅不入荆州之貢包壓菁茅王祭不共無

以縮酒束茅而灌之以酒為縮酒寡人是徵昭王南征而不復寡人

是問對曰貢之不入寡人之罪也敢不共給昭王之不

復君其問諸水濱師進次于陘楚子使屈完如師師退

次于召陵齊侯陳諸侯之師與屈完乘繩證反而觀之

曰以此眾戰誰能禦之以此攻城何城不克對曰君若

以德綏諸侯誰敢不服君若以力楚國方城山名在河南南陽府

觀屈完所對始若誠謂  
更屈完所謂服者蓋亦幾  
希耳蔡梁傳所以稱召陵  
得志為僅也胡安國乃云  
庶幾王者之事則過情矣

葉注見以為城漢水前以為池雖衆無所用之屈完及諸

侯盟。

齊人執陳轅濤塗陳公族諸侯侵陳。

陳轅濤塗謂鄭申侯鄭大夫曰師出于陳鄭之間國必甚

病若出于東方觀兵于東夷循海而歸其可也申侯曰

善濤塗以告齊侯許之申侯見曰師老矣若出于東方

而遇敵懼不可用也若出于陳鄭之間供其資糧屏履

其可也齊侯悅與之虎牢執轅濤塗秋齊伐陳冬諸侯

之師侵陳陳成歸轅濤塗。

丙寅二十有二年晉侯殺其世子申生

晉侯烝于齊姜武公妾生太子申生同母女弟為秦穆公夫人娶二女

于戎大戎唐叔子孫別在戎者狐姬生重耳小戎允姓之戎子生夷吾

伐驪戎今陝西西安府臨潼縣有驪戎城故驪戎國驪戎男女以驪姬歸生

奚齊其娣生卓子驪姬嬖欲立其子賂外嬖梁五在閭闈之

者與東關嬖五別在關塞外者使言于晉侯曰曲沃君之宗也

蒲今山西隰州有古蒲城春秋晉蒲邑與二屈今山西吉州有北屈廢縣晉屈邑君之疆

也不可以無主若使太子主曲沃而重耳夷吾主蒲與

屈則可以威民而懼戎且旌君伐乃使太子居曲沃重

耳居蒲夷吾居屈晉侯使土蒞築蒲與屈不愼冀薪焉公使讓之對曰詩云懷德惟寧宗子

惟城君其修德而固宗子何城如之三年將尋師焉晉

焉用慎退而賦曰狐裘彫茸一國三公吾誰適從晉

侯又使太子伐東山臯落氏赤狄別種今山西平定州樂平縣有臯落山寰宇記

即東山臯落氏地晉大夫諫曰君之嗣適不可以帥師且臣

聞臯落氏將戰。君其舍之。晉侯曰：寡人有子，未知其誰立焉，不對而退。及將立奚齊，既與中大夫成謀。謂里克將殺太子而難里克，使優施飲之酒而告之，故里克聽其謀，欲中立以自免，遂稱疾不朝。姬謂太子曰：君夢齊姜，必速祭之。太子祭于曲沃，歸胙于公。公田，姬置諸宮。六日，公至，毒而獻之。公祭之地，地墳與犬。犬斃，與小臣。小臣亦斃。姬泣曰：賊由太子。太子奔新城。曲沃，晉侯殺其傅杜原款。重耳謂太子曰：盍言子之志于君。太子曰：君安驪姬，是我傷君之心也。曰：然則盍行乎？太子曰：君謂我欲弑君也，天下豈有無父之國哉？吾何行如之？使人辭于狐突曰：申生有罪，不敢愛其死。雖然，君老矣，子少，國家多難，伯氏不出而圖吾君。伯氏苟出

而圖吾君，申生受賜而死。乃縊于新城。姬又譖二公子曰：皆知之。重耳奔蒲，夷吾奔屈。晉侯使寺人披伐蒲，重耳曰：君父之命不校，乃徇曰：校者，吾讎也。踰垣而走，披斬其袪，遂出奔翟。又使賈華伐屈，夷吾不能守，將奔翟。卻芮夷吾臣曰：後出同走罪也，不如之梁。今陝西同州府澄城縣有夏陽故城，古梁國。梁近秦而幸焉，乃奔梁。齊侯、宋公、魯侯、陳侯、衛侯、鄭伯、許男、穆公子曹伯會于首止。注見前。諸侯盟于首止，鄭伯逃歸，不盟。齊桓公衣裳之會，七王后陳媯生太子鄭，及叔帶叔帶有寵于后，欲立之。齊侯帥諸侯會于首止，會王太子，謀寧周也。左傳注：王以患后故將廢太子而立叔帶，故齊桓帥諸侯盟，太子以定其位。諸侯盟，王使周公召鄭伯，曰

吾撫汝以從楚。輔之以晉。可以少安。左傳注。王恨齊桓定太子之位。故召鄭伯使叛齊。鄭伯喜于王命。而懼其不朝于齊也。故逃歸。不盟。孔叔止之。弗聽。

楚人滅弦。今河南光州光山縣。春秋莒國地。

于是江黃道。漢書地理志。汝南陽安道國。陽安故城。在今汝寧府確山縣。栢。漢書地。南西平。故栢子國。西平縣。今屬汝寧府。方睦于齊。皆弦姻也。弦子恃之。而不事楚。又不設備。故亡。

秋九月戊申朔。日有食之。

晉滅虢。注見前。執虞公。仲雍後。注見前。

初。晉侯使荀息。晉之公族。食采于荀。因以為氏。以屈產之乘。屈產。何休曰。泉名。在今山西汾州府石樓縣。垂棘之璧。垂棘。晉地。出良璧。假道于虞。以伐虢。

注。虞城北對長坂二十里。謂之虞坂。寰宇記。春秋晉假道于虞。以伐虢。卽此路。虞公許之。宮之奇諫。不聽。晉里克荀息帥師會虞師。伐虢。滅下陽。故城在今平陸縣。

至是。晉復假道伐虢。宮之奇諫曰。一之已甚。其可再乎。諺所謂輔車相依。唇亡則齒寒者。輔。頰輔。車。牙車。內骨。故曰相依。其虞虢之謂也。弗聽。宮之奇以其族行。曰。虞不臘矣。在此行也。晉不更舉矣。十二月。晉滅虢。虢公醜奔京師。師還。館于虞。遂襲虞。滅之。執虞公。而修虞祀。且歸其職貢于王。

穀梁傳。獻公舉虞荀息。率馬操璧而前。曰。璧則猶是也。而馬齒加長矣。

丁卯。二十有三年。齊侯。宋公。魯侯。陳侯。曹伯。伐鄭。楚人圍許。諸侯遂救許。

諸侯伐鄭。以其逃首止之盟故也。楚子圍許。以救鄭。諸

侯救許乃還。

戊辰二十有四年。齊侯。宋公。魯侯。陳世子欵。鄭世子華。盟于

甯母。今山東兗州府魚臺縣有泥母亭。即春秋甯母地。泥。讀如甯。

齊人伐鄭。鄭孔叔請下齊以救國。公曰。吾知其所由來矣。夏。殺申侯以說于齊。秋。盟于甯母。管仲言于齊侯曰。招攜以禮。懷遠以德。齊侯修禮于諸侯。諸侯官受方物。鄭伯使太子華聽命于會。子華言于齊侯。請去洩氏。孔氏。子人氏。三族皆鄭大夫。以鄭為內臣。齊侯將許之。管仲曰。君以禮與信。屬諸侯。而以姦終之。無乃不可乎。子父不姦。之謂禮守。命共時之謂信。違此二者。姦孰甚焉。會而列姦。何以示後嗣。夫子華既為太子。而求介于大國。以弱

其國。亦必不免。齊侯辭焉。子華由是得罪于鄭。齊桓公衣裳之會。

己巳二十有五年。王人。齊侯。宋公。魯侯。衛侯。曹伯。昭公子陳共公襄

世子欵。盟于洮。今曹州府濮州洮城是。

謀王室也。鄭伯乞盟。請服也。齊桓公兵車之會一。

王崩。太子鄭立。是為襄王。

王崩于二十四年之閏月。太子惡太叔帶之難。懼不得立。不發喪而告難于齊。洮之盟。位既定而後告喪于諸侯。通志。春秋書惠王之崩。于是年十二月。從告也。

襄王

庚午元年。宰周公。宰孔也。天子三公不字。會齊侯。魯侯。宋子。桓公子襄公茲父。桓

孟子稱五霸齊桓為盛衰



邱之會雖明其禁而內寵  
爭黨究自犯之蓋無明德  
新民之實徒修勤遠歸好  
之辭未有人而不渝者是  
以仲尼之門五尺之童蓋  
稱五霸所爲正而不譎亦  
云彼善于此而已

後世行通鑑事覽

卷之四

三

公卒未葬。衛侯、鄭伯、許男、曹伯于葵邱。宋地。今河南歸德府考城縣有葵邱。聚其地有盟臺。亦名盟臺鄉。

齊侯會諸侯于葵邱。王使宰孔賜齊侯胙。史記。王賜桓公文武胙。彤弓。矢。

曰：天子有事于文武，使孔賜伯舅胙。齊侯將下拜。

孔曰：且有後命。天子使孔曰：以伯舅耄老，加勞賜一級。

無下拜。對曰：天威不遠，顏咫尺。小白余敢貪天子之命。

無下拜。恐隕越于下，以遺天子羞。敢不下拜。下拜。登受。

諸侯盟，陳牲而不殺，讀書加于牲上，壹猶專也。明天子之

禁。初命曰：誅不孝，無易樹子。無以妾爲妻。再命曰：尊賢育才，以彰有德。三命曰：敬老慈幼，無忘賓旅。四命曰：

士無世官，官事無攝，取士必得，無專殺大夫。五命曰：無曲防，無遏籜，無有封而不告。曰：凡我同盟

之人，既盟之後，言歸于好。宰孔先歸，遇晉侯。史記。晉獻公病，行後

未至。曰：可無會也。齊侯不務德而勤遠畧，故北伐山戎，南

伐楚，西爲此會也。東畧之不知，西則否矣。其在亂乎。在

也。微誠獻公，君務靖亂，無勤于行。晉侯乃還。齊桓公衣

言晉將有亂。君務靖亂，無勤于行。晉侯乃還。齊桓公衣

汪氏克寬曰：葵邱之會，乃桓霸盛衰之幾。鄭康成所謂

桓德極而將衰也。蓋自再盟幽而諸侯協存，邢衛却狄

盟召陵帖楚而列國安，盟首止于洮而王室寧。及乎葵

邱而極盛矣。自是而後，城杞之功不若城邢，救徐之師

緩于救許，伐黃不卹，謀鄭無成，而霸業于是遂衰。論者

謂葵邱以前猶自朔至望之月，葵邱以後猶自望至晦

之月，蓋由其心有勤怠之殊。是以其功有盛衰之漸也。

晉侯詭諸卒，里克殺其君之子奚齊。殺公羊作弒。

初，晉獻公使荀息傅奚齊。公疾，召之曰：以是藐諸孤，辱

在大夫，其若之何。稽首而對曰：臣竭其股肱之力，加之

以忠貞，其濟君之靈也。不濟，則以死繼之。公卒，里克不

也。卷之四

卷之四

三

鄭晉大夫以三公子之徒作亂三公子申生重耳夷吾里克告荀息

曰三怨將作秦晉輔之子將何如荀息曰死之里克曰

無益也荀息曰吾與先君言矣不可以貳公羊傳獻公死奚齊立里克

克謂荀息曰君殺正而立不正廢長而立幼如之何願

與子慮之荀息曰君嘗訊臣矣臣對曰使死者反生生

者不愧乎其言里克知其不可與謀遂殺奚齊于次喪次

宋以公子目夷桓公庶子為左師宋官名

初宋桓公疾太子茲父固請曰目夷字子魚長且仁君其

立之公告目夷目夷曰能以國讓仁孰大焉且又不順

遂走而退公卒茲父立是為襄公使目夷為左師以聽政于

是宋治目夷之後以魚為氏世為左師

辛未二年狄滅溫注見前

蘇子叛王即狄又不能于狄狄入伐之王不救故滅蘇

子奔衛

晉里克弑其君卓及其大夫荀息

里克既殺奚齊荀息將死之人曰不如立卓子而輔之

荀息立卓子以葬獻公里克殺公子卓于朝荀息死之

家氏鉉翁曰奚齊死于喪次君臣之分未明卓子死于既葬君臣之位已定故書法不同

秦人納晉公子夷吾于晉周公忌父周卿王子黨周大夫會

齊隰明齊莊公購四世孫立之

里克及不鄭使屠岸夷告重耳于狄曰國亂民擾子盍入

乎重耳辭重耳告舅犯犯曰不可夫堅樹在始始不固本終必梢落大喪大亂之刻不可犯也重耳

重耳夷吾前後對使之詞賢不肖相去固殊然重耳若無窮犯亦未必及此秦穆既以重耳為仁又聽公子摯之言先置不仁以滑其中卒之河外之城未獲韓原之師已與論詐相傾

無非為利春秋無義戰彼時之民奚以為生哉

徐世原

卷之四

三

見使者曰父生不得供備灑掃之臣死又不敢泄喪以重其罪且辱在大夫敢辭舅犯即狐偃字子犯突之子

呂甥姓瑕呂各節甥及卻稱晉之公族食采于卻以邑為氏亦使蒲城告夷

吾于梁曰重賂秦以求入吾王子夷吾許諾夷吾告卻芮芮曰不可失也蓋盡國以賂外內無愛虛以求入而後圖聚呂甥出告大夫平鄭使請

君子秦其辭曰天降禍于晉國喪亂並臻以君之靈罪人克伏其辜羣臣莫敢寧處將待君命君若不

忘先君之好辱收其逋遷裔胄而建秦伯德公子穆使立之晉國其誰非君之羣隸臣也

公子繫弔重耳曰喪不可久時不可失公子其圖之重耳

告舅犯舅犯曰喪人無以為寶仁親以為寶重耳見使

父死之謂何又因以為利天下其孰能說之者曰父死之謂何或敢有他志以辱君義稽顙而不拜

哭而起起而不私公子繫退弔夷吾如弔重耳之命夷吾

告卻芮芮曰公子勉之猶潔夷吾見使者再拜稽首起

不行重賂配德子無愛財

而不哭私于公子繫曰里克與我矣吾命之田百萬不

鄭與我矣吾命之田七十萬君苟輔我入且入河外列

城五為君之東游津梁之上無有難急也黃金四十鎰

白玉之珩六雙不敢當公子請納之左右公子繫反致

命秦伯曰吾與重耳重耳仁公子繫曰不如置不仁以

滑擾也其中可以進退秦伯乃發兵送夷吾于晉時齊

侯聞晉亂以諸侯之師討晉及高粱晉地今山西平陽府臨汾縣有高粱

梁墟都亦名而還使隰朋帥師會秦師周公忌父王子黨會

齊隰朋立夷吾為晉侯是為惠公晉侯使平鄭聘秦且謝緩

賂史記晉使平鄭謝秦曰始夷吾以河西地許君今幸

秦寡人爭之得入立大臣曰地者先君之地君亡在外何得擅許

弗得故謝殺里克以說將殺里克使謂之曰微子不

及此雖然子弑二君與一大

弗得故謝

殺里克以說

及此雖然子弑二君與一大

弗得故謝

平鄭

周襄王

三

夫為子君者不亦難乎。對曰：不有廢也。君平鄭在秦，聞

何以典，欲加之罪，其無辭乎。伏劍而死。里克死，請秦伯重問也。

厚幣以召呂甥，卻稱冀芮，別邑于冀，即以出晉君，入重耳。秦伯許之，鄭先歸，秦使洽至，秦

夫報問，且召三子。冀芮曰：幣重而言甘，誘我也。遂殺平

鄭及鄭與里克之黨。祁舉及七輿大夫左行共華右行

七輿申生下軍之眾大夫也。平鄭子豹奔秦。

申壬三年，王子帶以戎入寇。

揚拒泉臯。皆戎邑。今河南府洛陽縣南有戎城。又縣西南有泉亭。亦曰前城。服虔曰：前讀為泉，即泉

戎也。伊洛之戎，諸緝戎居伊水洛水之間者。同寇京師，入王城。王子帶

召之也。秦晉伐戎以救周。晉侯平，和也。戎于王。王以戎

難故，討王子帶。王子帶奔齊。事在四年。齊使仲孫湫，齊大夫。入

聘，且言王子帶事畢，不與王言。歸復命曰：王怒未怠，不

十年，王弗召也。事在五年。

癸酉四年，春三月庚午，日有食之。

楚人滅黃。

黃人恃諸侯之睦于齊，不共楚職。曰：自郢今湖北荊州府江陵縣有

紀南城，楚熊貲徙都此。一名郢城。及我九百里，焉能害我。楚遂滅之。穀

傳：貫之盟，管仲曰：江黃遠我而近楚，楚為利之國也。若

伐而不能救，無以宗諸侯矣。桓公不聽。及楚滅黃，桓公

齊侯使管夷吾入聘。

齊侯使管仲平戎于王。王以上卿之禮饗仲。仲辭曰：臣

賤有司也。有天子之二守國高在。國氏高氏皆齊公族世為齊上卿。高侯見

前國懿仲之時也若節春秋來承王命何以禮焉陪臣

子日歸父若節乃受下卿之禮而還

甲戌五年齊侯宋公魯侯陳侯宣公子衛侯鄭伯許男曹伯

會于鹹衛地今直隸大名府開州鹹城是

諸侯會于鹹齊桓公兵淮夷病杞故杞初都雍邱今河南開封杞縣雍邱

故城是後東徙淳于今山東且謀王室也於是諸侯成

京師為戎難故齊遂城緣陵即營陵故城在今遷杞事

六年杞于是遷緣陵其後復徙淳于

晉饑秦輸粟于晉

晉薦饑麥禾皆不熟乞糴于秦秦伯問百里奚史記晉滅虜虜其大夫百里奚為秦穆公夫人媵百里奚亡走宛楚鄙人執之穆公聞百里奚賢以五段羊皮贖之以歸時百里奚年已

七十餘穆公與語國事三日大悅授之國政號曰五段大夫與諸乎對曰天災流行

國家代有救災恤鄰道也平鄭子豹在秦請伐晉秦伯

曰其君是惡其民何罪于是輸粟于晉自雍秦都及絳

晉都注相繼左傳疏雍臨渭絳臨汾渭水自雍而東至俱見前相繼華陰入河從河逆流而上至汾陰入汾又

逆流東行而通絳命之曰汎舟之役明年秦饑乞糴于晉晉人

弗與慶鄭晉大夫諫弗聽

乙亥六年沙鹿崩沙鹿土山在今直隸大名府元城縣其西有沙鹿城

晉卜偃日期年將有大咎幾亡國

丙子七年楚人伐徐徐國注見前

徐即諸夏故也

齊侯宋公魯侯陳侯衛侯鄭伯許男曹伯盟于牡邱在今山東

東昌府在平縣東北。遂次于匡。今直隸大名府長垣縣有故匡城春秋衛邑。諸侯之大夫救徐。

盟于牡丘。齊桓公兵車之會三。尋葵丘之盟。且救徐也。魯公孫敖

慶父子帥師。及諸侯之大夫救徐。諸侯次于匡以待之。

齊師曹師伐厲。讀作賴。楚與國伐之以救徐。今湖北德安府隨州有厲鄉。在厲山下。古厲國地。

不克。楚敗徐于婁林。徐邑。今江南鳳陽府虹縣有古婁亭。春秋婁林地。齊又為

徐伐英氏。英國。注見前。以報婁林之役。事在九年。

夏五月。日有食之。左傳不書日。朔官失之也。

齊大夫管夷吾卒。

管仲病。齊侯問曰。羣臣誰可相者。仲曰。知臣莫若君。公

曰。易牙。卽雍巫。如何。對曰。殺子以適君。非人情。不可。公曰。

蘇洵以管仲不能舉賢自代責其不知似矣。然仲之疾未嘗不薦。陽朋而朋之才。又不及仲。縱不死。亦不能去。豈刁易牙即方況其

死耶。左傳記寺人貂漏師于多。而仲何不即于此時。誅貂。則易牙不能進而開方去矣。仲豈見不及此。毋亦慮桓公之不已聽。而反聽貂以斥已耶。所以為器小。所以為霸臣。

開方。衛公子。去其國事齊。如何。對曰。背親以適君。非人情。難近。公

曰。豎刁。卽寺人貂。如何。對曰。自宮以適君。非人情。難親。仲卒。

齊侯不用其言。卒近用三子。管子。仲寢疾。桓公問曰。仲

移。仲未對。公曰。鮑叔何如。對曰。鮑叔君子也。其為人好善。而惡惡已甚。見一惡。終身不忘。公曰。然則孰可。曰。隰

朋可。朋之為人。好上識而下。問居其家。不忘公門。居公門。不忘其家。事君不二其心。亦不忘其身。其朋乎。公又

問。仲曰。臣聞之。消息盈虛。與百姓誦信。然後能以國寧。明其可乎。言終。喟然歎曰。天之生朋。以為夷吾舌也。其

身死。舌焉得生哉。史記。是歲。管仲隰朋皆卒。

晉侯及秦伯戰于韓。韓原。在今陝西同州府韓城縣。獲晉侯。

秦伯伐晉。及韓。晉侯謂慶鄭曰。寇深矣。若之何。對曰。君

實深之。晉侯之入。許賂秦以河外列城五。既而不與。晉饑。秦輸之粟。秦饑。晉閉之糴。故秦伐晉。可

若何。公曰。不孫。卜。右。慶鄭吉。弗使。乘小駟。鄭入也。慶鄭

韓之戰。秦忿晉怠。曲直顯然。故韓簡不能止秦。伯而秦遂獲晉侯。史記稱秦伯馳追晉君。及為所圍。食善馬者三百人。馳冒晉軍解。

其圖云云夫一馬豈能供  
三百人之食耶史遷因事  
附會大率類此

從世歷代通鑑輯覽卷之四

諫弗聽。慶鄭曰。古者大事必乘其產。生其水土而不知其  
志。今乘異產及懼而變。將與人易。進退不可周旋。不能君必悔之。遂逆秦師。使請戰。戰  
于韓原。晉戎馬還澠而止。公號慶鄭。慶鄭曰。復諫違卜。  
固敗是求。又何逃焉。遂去之。梁由靡御韓簡。號射為右  
輅。秦伯將止之。慶鄭以救  
公諛之。遂失秦伯。輅  
五嫁反。迎也。止獲也。秦獲晉侯以歸。晉大夫反首。亂  
下。拔舍。示憂戚也。從之。秦伯使辭焉。曰。二三子何其  
感也。寡人之從君而西也。亦晉之妖夢是踐。惠公初立。  
國。遇共太子。與載而告之曰。夷吾無禮。余得請于帝矣。  
將以晉畀秦。秦將祀余。對曰。神不歆非類。民不祀非族。  
君祀無乃殄乎。君其圖之。太子曰。吾將復請。七日。新城  
西偏。有巫者而見我焉。許之。遂不見。及期而往。告之曰。  
帝許我。罰有罪矣。敝于韓。杜預曰。豈敢以至。晉大夫三  
拜稽首曰。君履后土而戴皇天。皇天后土實聞君之言。

羣臣敢在下風

史記秦穆公亡善馬。岐下野人共得而  
食之者三百餘人。吏逐得。欲法之。公曰。  
君子不以畜產害人。吾聞食善馬肉。不飲酒。傷人。乃皆  
賜酒而赦之。三百人者。聞秦擊晉。皆求從。穆公馳追。晉  
君不能得。反為所圍。于是食善馬者三百人。  
馳冒晉軍。解其圍。遂脫穆公。而反生得晉君。

王命秦伯釋晉侯。晉侯歸國。

王聞秦獲晉侯。曰。晉我同姓。為請于秦。秦伯夫人。夷吾  
姊。

聞。晉侯將至。乃以太子與女。登臺而履薪焉。使人以免

音問。服衰經逆。且告曰。若晉君朝以入。婢子夕以死。夕

以入。則朝以死。唯君裁之。秦伯謂其大夫曰。我得晉君

以為功。今天子為請。夫人是憂。且晉人感憂以重我天

地。以要我。不圖晉憂。重其怒也。我食吾言。背天地也。重

怒難犯。違天不祥。必歸晉君。公孫枝。秦大夫  
子桑。曰。歸之而

周襄王

長

陰飴甥之對秦伯實可謂  
等辭冷

質其太子。必得大成乃許。晉平十。月。晉陰飴甥即呂甥食采于

陰故曰會秦伯盟于王城。秦地在今陝西同州府朝邑縣東。秦伯曰。晉

國和乎。對曰。不和。小人恥失其君。而悼喪其親。不憚征

繕以立圍也。圍。忠公太子。曰。必報讐。君子愛其君。而知其罪。

不憚征。繕以待秦命。曰。必報德。以此不和。秦伯曰。國謂

君何。對曰。小人戚。謂之不免。君子恕。以為必歸。貳而執

之服。而舍之。德莫厚焉。刑莫威焉。此一役也。秦可以霸。

納而不定。廢而不立。以德為怨。秦不其然。秦伯曰。是吾

心也。改館。晉侯饋七牢焉。十一月。晉侯歸。殺慶鄭。而後

入。是歲。晉又饑。秦伯又餼之粟。曰。吾怨其君。而矜其民。

晉侯獻秦以河西之地。使太子圍。為質于秦。秦妻以宗女。後惠公病。子圍棄其妻。亡歸晉。

丁丑。八年。春。正月。戊申朔。隕石于宋。五。星隕為石。數之則五。是月。六鷁

鷁。水鳥。退飛過宋都。遇迅風而退飛。

時內史叔興聘于宋。宋公問曰。是何祥也。對曰。今茲魯

多大喪。公。子季友。公孫茲卒。明年。齊有亂。齊桓。君將得諸侯而不

終。事具後。

齊侯。宋公。魯侯。陳侯。衛侯。鄭伯。許男。邢侯。曹伯。會于淮。左傳

注。臨淮郡左右。

諸侯會于淮。謀郟。左傳注。郟為淮夷所病故。郟城在今兗州府嶧縣東。故郟國。且東

畧也。齊桓公兵車之會四。城郟。役人病。有夜登邱而呼曰。齊有亂

不果。城而還。齊桓公主會盟。自北杏始。迄會淮終。衣裳止。于甯母。于葵邱是也。貫及陽穀。不在此數。兵車之

會四。于洮。于鹹。于牡邱。于淮是也。召陵不在此數。



戊寅九年魯滅項。今河南陳州府項城縣。有故項城。春秋項國。

淮之會。魯侯師未還而取項。齊人以為討。止公。夫人姜

氏會齊侯于卞。今山東兗州府泗水縣。卞縣故城春秋魯卞邑。以為請。乃歸

齊侯小白卒。

齊侯之夫人三。王姬。徐嬴。蔡姬。皆無子。齊侯好內。內嬖

如夫人者六人。長衛姬。生無虧。史記作無。詭。即武孟。少衛姬。生元

公。即惠。鄭姬。生昭。即孝。葛嬴。生潘。即昭。密姬。生商人。即懿。


宋華子生雍。公與管仲屬昭于宋公。以為太子。雍巫即

牙。有寵于長衛姬。因寺人貂。即豎才。以薦羞于公。亦有寵

公許之。立無虧。冬十月乙亥。桓公卒。易牙與寺人貂。因

內寵以殺羣吏。而立無虧。太子昭奔宋。十二月乙亥。赴

辛巳夜殯。史記桓公病五公子各樹黨爭立。及桓公卒。遂相攻。桓公尸在床六十七日。尸蟲出于戶。



癸卯丁卯



